

Hibru Quran

Moji Hibru yonore Quran ruaya.

Mimitani

Yesuji Sombungo ropeko ore nadiineo gosa 35 ore so tariko ni mo tinaine so manegobenen, inoji Quran yo qurangu Juda mankekerisie ninigo yonore ruaya. Juda yonoji Hibru (kotu) buho mibun ore tinayanun Hibru mibun. Goineji Juda mankekerisie ninigo oi kekesuesue kokoine eyarebi Yesure kadi poretin bokeingo manesuku Juda yonore kadi rangbanineo neheineo moke ropeingo manebun. Kadi rangbanine oi Kadi bunore yamenkeke.

Quran yoore buho korun 3 oi ini:

1. Yesu Anutire Made inoji joisereren sogu-ine maneru onuine oiji Mamaine rengabeminde fune maneya. Ore eru Sombun mimereren Moses eru kajeqoun ninigo sosowo yadureru ropekiine fukega.

2. Anutuji Yesu igodongaru daman tatari-ine tomiri sorin gio sinannonun qoruine fukeru goin. Inoyonunde dari keseya ore boji ririga tariko sorin gio sinan goine yonore so embimbinkimin.

3. Mankekerisie nonun Yesu manesin gabenen agiburanonun bokeru munan qa noreru komegone bomuku nobeko kokoi so manegobenen. Sorin gio rangbanine oi sasako onuine fukeko babi Yesuji munanqqore fune

foriine barariṅga noreru inoyonunde boji ririga onjuine enimin ore rurua eya.

Mankekerisie ninigo soguine yonore mosire sundu oi tatariineo (Gaṅ 11) quraṅgaru mamane-sinyanunji egu gbanjin ore inji bapakare yabega, “Kekesuesue enjarebi ore joisereren oi yamen keku karieru maneku Yesuke gbin einebi.” Buk yooore unṣowon eru sinan bobo buṅo oi anjiineke.

Buk yooore mobe qoruine 10 oi inji:

Buṅo funfunṅaine: Kristoji Anuture funṅe barariṅga nore foreya 1.1-3

Kristoji mimereren sosowo yadurega 1.4–2.18

Kristoji Moses eru Josua yaturega 3.1–4.13

Kristoji sorin gio sinan sosowo yadurega 4.14–7.28

Kristore jojofo buru oi jojofo buru ranṅbanine odurega 8.1–9.28

Kristore dari fuji boji sosowo yadurega 10.1-39

Mamanesin oi ya funfunṅaine eru qoruine 11.1–12.29

Eebobononunji Anutu beufi oteinebi 13.1-19

Oṅgawowosi tatariine 13.20-21

Man papakare buṅo eru momojo buṅo tatariine 13.22-25

Anutuji Madeine soreme wakiru buṅoine barariṅga noreya.

¹ Anutuji ronere ronekonṅo funṅaru kadi furuine furuine boyoberu buṅoine barariṅga noreinṅo maneya. Onu maneru buṅoine daman kokoine kajeṅon ninigo boburoru manyanunṅo ruame totogo mibi apa nasopononunji maneru go wapebuṅ. ² Onu go wapebuṅyon, daman

tatariineo gobeneŋ yoo Madeine soreme buŋoine barariŋga noreru totogo miko manebeŋ. Madeine iŋoji Mamaine bapigako Sombuŋ moreŋ eru ore yareya-yakuŋ sosowo bofukebire Madeineji daman tatariineo ya sosowore Rau fukeiŋ ore mitarime goga. ³ Anutуре kamasi Madeine pe teko wakiru oduya. Anutуре kuririquranji oi igoko boribori eko sasako oŋuine ɲonebeŋ. Agiburaŋɲoŋuŋ keririke foreru ɲadiineo Sombuŋ kaeo roperu ɲeɲeine roru Ropekiinenonunde me furoineo ɲega. Oo ɲeku Sombuŋ morende yareya sosowo oi buŋoine usuɲinekeji osigaru siŋaŋ garu goga.

Anutуре Madeji Sombuŋ mimerereŋ yadurega.

⁴ Anutuji Madeine tina oteko jiŋo oiiji Sombuŋ mimerereŋ yoŋore tina odureru kuririineke fukega, ore so Madeineji Sombuŋ mimerereŋ yadureru soguneyanuŋ fukeko mea yukuineo gogobi. ⁵ Anutuji daman mogo Sombuŋ mimerereŋpuine yoŋoreone more buŋo iŋi so miya.

“Goji nonde Made fukende nonji muɲambe gore Mama fuke garego.”

Oŋuakoŋ ore buŋo mo iŋi mime pega,

“Nonji iŋore Mama fukebe iŋoji nonde Made fukeiŋ.”*

⁶ Buŋo oi moke jikigaru moru Madeine mitarime moreŋgo wakiŋgo eya, daman oo bonieru iŋi miya,

“O Sombuŋ mimerereŋpune, ɲoŋo sosowo iŋore ohowe baku miteŋ gaku goinebi.”*

* 1:5: Kiki 2.7; 2 Sml 7.14; 1 Hist 17.13 * 1:6: Dut 32.43

7 Sombun mimereren oi buŋo inŋi yajime pega,
 “Anutuŋi mimererenpuine qowirie yabeko
 gbiŋ onjuine fukeru raru warenimin.
 Kinanqoqopuineŋi qowirieru misi borun
 onjuine fukeru roware enimin.”*

8 Oi onju yayiyayon, Madeine oi buŋo mo inŋi ojime
 pega,

“O Ofon, goji morumbon nenegoo daman tatari-
 ine tomiri ne ropeigon. Gunugo usuŋineke
 oiji qotin nobende eebobo poretin oiji qo-
 rumangore moge fukeru pe ropein.”*

9 Goji eebobo posiinere ani pe gareko eebobo
 kekesiinere mango rigangako rosi eku go
 wapemen.

Ore eru gore Ofon Anutu inoji gore ani pe teko
 go jeri jijiji ogopugo yadureru mokemoke
 yobu rau gareme goge.”

10 Madeinere buŋo mo oi inŋi,

“O Ofon, goji funfungaineo morende kobeten
 igodonngande Sombunde koroina koroina
 oiji gore mequran fukeru pega.”*

11 Sombun moren sosowo oiji kaman mariku
 onjuine rangbanine fukeru mataeniminjon,
 goji sanangaru dima ropemin.

12 Moki poporingaegobenon, goji ore so qonikin
 nononeine oi kaman soki kipegobenon
 onjuine poporin yabende qowirienimin.

Ya sosowo kepieinjon, goji kamasi moakon oi
 akon fukeru gosago tatariine tomiri go
 ropemin.”

* 1:7: Kiki 104.4 * 1:8: Kiki 45.6-7 * 1:10: Kiki 102.25-27

¹³ Anutuji daman̄ mogo Sombun̄ mimereren̄puine yon̄joreone more bun̄jo in̄i so miya,

“Goji wareru me furoneo n̄ende non̄ji kisopugo daman̄ botuine yoo ode rondin̄ yabebe waki yabeko gore kufure oodesin̄ fukebi kokorian̄ ekimin̄.”*

¹⁴ Madeine eru bun̄joine bun̄joine on̄u miyayon̄, Sombun̄ mimereren̄ oi moji fukegobi? Sosowo yon̄joji Anuture kin̄an̄qoqo iirupu fukegobi. On̄u fukeru n̄in̄igo sen̄gin̄ban̄gin̄ rauganimin̄, oi bapi yabenimin̄ ore sore yabeme gogobi. On̄u.

2

Man̄non̄un̄ egu so kerisiekimin̄ ore sin̄an̄ bobo bun̄jo

¹ Ore eru Bīje bun̄jo maneben̄, oi poretin̄ mane tanīngakimin̄ ore yamen̄ keku kaje ru-ainebe. Morengo gogore ya mo oga nobeko kosa ra wareru qosorieku qanda gokimin̄ ine, Yesure munan̄qoqo gio odureru mo goku egu sibirigakimin̄. ² Bun̄jo oi in̄i mitanīngabemin̄: Rone Sombun̄ mimereren̄ yon̄joji Bīje bun̄jo mibi oiji n̄in̄igo kipe yabeko gobun̄. On̄u goku uri yon̄joji Kadi bun̄jo so rengaru agi kigabun̄, Anutuji sosowo yon̄jore bun̄jo poretin̄ akon̄ mitariku geoine bokirie yareme yobin̄ paiyan̄un̄go ropeko go wapebun̄.

³ Yon̄joji yobin̄ bofukebi nin̄o on̄uakon̄ bun̄jo qakimin̄ ine, ore geoinere urun̄u kamieru usenoben̄? Munan̄qoqo gio sogo oi keta paio qaqouma ekimin̄ ine, ore geoineone

* **1:13:** Kiki 110.1

kamieru useingo embimbinkakiminj. Ofonji fungaru munanqqore fune bararinga nareko goineji bujo oi miineone maneru kitingaku misanangkabi saueru saga nobeya. ⁴ Oi kitingaku mitaningabi Anutuji yonoke moko dimaku bujoyanun kitingaku miko mosi qoqowirie soi fune fune oi usunineke fukeko Moro Tiriine keseme man anjinere so jankeko saga nobeya. Onu.

Yesuji kakanonun fukeru Sombungo oga nobeingo manega.

⁵ Sombun moren gariine fukeniminde bujo miegobenen, Anutuji nonun oo Sombun mimereren mea yukuyanungo gokiminde buru so mitigaya. ⁶ Onu matayon, bujo oi moji kitingaku mime Biye Qurande mobe mogo inji pega, “Moren ni oi mo eru go injo manesu teege? Sombun eru morende Ni foriineji mo fukeko oi sinan gaega?”

⁷ Goji oi baba waki etende daman pomponjine Sombun mimereren yonore mea yukuo wakiru wawakiine fukeru goya. Goko oga-gande kuririquranineo ropeko nigin bote resonbureson otende kuririineke fukeru tinabineneke goga. Onu goku yareya sosowo sinan garu goga.

⁸ Mequranjo sosowo injore mimitire yukuineo gonimingo baba waki yabende goniminj.” Bujo ore so ya sosowo oi injore usun rurumango goniminj ore bawaki yaberu oo ya mo so bokeme injore bujore rurumango so pena. Buru onu

* 2:6: Kiki 8.4-6

ruayayon, daman yoo mequranine sosowo oi injore usun rurumanjo bawaki yabeme bunjoine renjaegobi ore so, so noneegobenenj.

⁹ Onjuine so noneegobenenjon, Yesuji inji qowirieru gome noneegobenenj: Komere joisereren maneya ore Anutuji ogagame kuririquranineo ropeko nigin bote resonjbureson oteko nonebenen kuririineke fukeru tinabineineke goga. Anutuji yaunmoririine noduingo maneru sosowo nonunde eru komere joisereren maneingo mitariya. Ore eru bawaki teme daman pomponine Sombun mimereren yonjore mea yukuo wakiru wawakiine fukeru goya. Onjuine goyayon, daman yoo tinabine ropekiine roru goga. ¹⁰ Anutuji yareya sosowore funne fukega. Inoji sosowo nonun inoyone miten gatekimin ore eru bofuke nobeme gogobenenj. Inoji ninigo boakon oga nobeko kuririquranineo ropekimingo manega. Onu maneru munanqoqononunde Rau ino so sabareko joisereren maneru onjuine oiji gioine oi ba foreko kuririquranine sosowo bofukeingo maneko sagaya.

¹¹ Moji bagbagbaga nobeega eru ninigo gbagbataenine fukeegobenenj, sosowo nonunde kukure Rauji ino moakon fukega. Ore eru Yesuji tinanonun “Ogopune,” onu miingo manequnine so maneega. ¹² Funnenonunde Bije bunjo mo inji mime pega,

“Nonji gore tina oi nakene ogopu yonjore onjaku tamae yareku mankekerisie kufufun bo-

tuyanunگو dimaku mitenگو guku gobeminگو.”*

¹³ Onuakonگو ore Bine bunoine mo ini mime pega, “Nonji koimo mamanesinگو Anutureo ruaru gobeminگو.” Neneineo moke ore Bine bunoine mo oi ini mime pega, “Mane, nonگو eru Anutuji odumade nareya, ninoji yoo gogobenenگو.”*

¹⁴ Moji qokome nobeinde usunگو roru goga, Yesuji oi bourungame rakainگو ore eru komeme komeine oiji sirigaya. “Sembene Rauine bourungabeminگو,” miku ninigo dari funonunگو ke gogobenenگو, ore eru inoji onuakonگو nonunگو ke kamasi moakonگو oi akonگو morenگو ni fukeya. ¹⁵ Ninigo gogoyanunگو morengo gogobi ore so komekiminde kokoianunگو kipe yabeko go wapebunگو, oi sosowo pirue yabeme posikeniminگو ore eru morenگو ni fukeya. ¹⁶ Sombunگو mimererenگو sinگو yabeingo ore morenگو ni so fukeyayonگو, Abrahamde osigidapuine nonunگو maneru sabareku bapi nobeeinگو ore onu fukeya.

¹⁷ Funگو ore eru inoji yareya sosowo oo ogopuine nonunگو ke kamasi moakonگو oi akonگو fukeya. Sorinگو gio sinگو nonunگو qoruine fukeru gioine ba sarigaku nonemainگو noreru goinگو ore nonunگو ke kamasi moko fukeya. Kamasi moakonگو fukeru soine minebobononunگو fukeru sorinگو sinگو qoruinere gio baega. Oi baingo ore agiburanonunde furi baru Anuture jinoo oi keririkeya. ¹⁸ Morenگو ni fukeme esoigabi inoyone joisererenگو maneru goya, ore eru ninigo esoi nobeegobi, nonunگو soine bapi nobeeinگو. Onu.

* **2:12:** Kiki 22.22 * **2:13:** Ais 8.17, 18

3

Yesuji Moses odureru ropekiine fukega.

¹ Ore eru mankekerisie ogopunonun gbagbataenine Sombun Rauineji onga yareko ninjoke kubu yasogo moakon gogobi, nonoji man mamanesunanun ghen akon Yesure ruaru goinebi. Anutuji oi soreme aposol fukeru sorin gio sinannonun qorune fukega, inore onu mifukeegobeney. ² Mosesji Anuture kufufun sosowo oi bose-qosembeine tomiriyon, daman so sinan yaberu goya. Ore so Yesuji onuakon moji igodon गया, inore bunjo bebetanine tomiri poretin boyoberu bose-qosembeine tomiriyon, daman so basarigaru goya.* ³ Pi eru ni pi baya, oi osoe yatebenen ketigaqogo nire tinabineji pire tinabine kokoine odureru pega. Ore so Moses eru Yesu osoe yatebenen Yesure kuririquan ropekiineji Moses kokoine odurega. Funine onune noneru bofukeegobeney.

⁴ Pi sosowo oi more mequran fukegobiyon, ya sosowo oi Anuture mequran fukega. ⁵ Mosesji Anuture kufufun sosowo oi bose-qosembeine tomiriyon, daman so kinan qa yareku goya. Onu goku Anutuji jiki ni funine more miya, bunjo ore soso bunjo oi ronekon bararingaru munan mogeine dimaya. ⁶ Onu dimayayon, Kristoji Anuture Made fukeru Mamainere bunjo bebetanine tomiri basarigaru kufufunine daman so sinan noberu goga. Anuture kufufun oi nonun fukegobeney. Senginbanjin bofukekimin ore origaku oo qakatoru sakinonun ba ropeku koimo dimaku

* 3:2: Jare 12.7

sananga forekimin̄ ine, Anuture man̄kekerisie kufufun̄ fukeru gokimin̄. Onu.

Qoqomuku eku egu gokiminde sin̄an̄ bobo būno

⁷ Ore eru n̄on̄oji Moro Tiriineji būno in̄i miega ore so fukeinebi,

“Mun̄ambe yoo Anutuji on̄ga n̄areme būn̄oinere san̄u bame manegobi ine,

⁸ man̄-n̄an̄un̄ mamanesu sembeneji so keboji-gainebi. N̄on̄ore apa n̄asopuji moren̄ buroi-neo foru daman̄ mogo Anutu igogaru es-oiga teru oyowo ebūn̄, n̄on̄o ore so Anutu so igogaru einebi.

⁹ Yon̄oji moren̄ buroi-neo wareru Anutu n̄on̄ esoi nuku gobun̄. Mosi qoqowirie eba eku gobon̄, yon̄oji oi gosa 40 ore so n̄oneru goku oi jibu n̄on̄ so manesin̄ nubi man̄neji sembeako gobon̄.

¹⁰ Ore eru n̄in̄igo kubu yasogo daman̄ oo moren̄go gobun̄, yon̄ore eru man̄ne rigangame in̄i mibon̄, ‘N̄on̄oji jijiki man̄-n̄an̄un̄go witijibu eru tintun̄ raegobi. Gogore fun̄ne qaji n̄areru gobon̄yon̄, oi so mane muku wape-bun̄. Mata!’

¹¹ Onu miku yomben̄ qayareku būnone mitigaru mimipan̄ būnoneji oi kiperu in̄i mibon̄, ‘N̄ene mane n̄eniminde buru yarebonyon̄ yon̄oji sen̄gin̄ban̄gin̄ oo so ropenimin̄.’ ”*

¹² O man̄kekerisie ogopune, n̄on̄oji in̄i ore sisin̄an̄ eku goinebi: N̄on̄oreone more man̄ji kekesieko mamanesin̄ineji gban̄iru wakiko Anutu gogo Rauine egu n̄adi gaku goin̄. ¹³ Onu

* **3:11:** Kiki 95.7-11

matayon, agiburande suruyoinji eadu enareme oiji nonoreone more man egu kejigain ore bio una so botunanungo man-nanun bapakare nadungadun eku goinebi. “Munambe” bunjo oi miegobenen, ore so fanqoqo nadungadun eku goinebi. ¹⁴ Nonun Kristo mane sabareku inoke kubu yasogo moakon fukeru gogobenen. Rone mannonun kerisieru manyoka bokeru koimo bofukeru goben, onuine morengo gokiminde so yamen keku sanangaru dimakimin ine, nonun senjinbanjin bofukekimin.

¹⁵ Bine bunjo oi moke miku inji quraggago, “Munambe Anutuji onga nareme bunoinere sanu bame manegobi ine, man-nanun so kebojigainebi. Nonore apa nasopuji Anutu qougaru oyowo ebun, nonoji ore so Anutu so qougaru einebi.”*

¹⁶ Ninigo uri yono Bine bunjo maneru Anutu qougaru oyowo ebun? Mosesji kufufun oga yabeme Ijpt bokeru warebun, yono sosowo onu ebun.* ¹⁷ Ninigo uri yonore eru gosa 40 ore so manine rigangame rosi eyareko gobun? Ninigo agiburan ebi qokome yabeme saki fuyanunji moren buroineo waki qabun, yonoreo onu fukeya. ¹⁸ Womoo neje mane eninde buru ruaru yonoyanunde morengo so ropenimin ore bunjo mitigaru mimipan bunoineji kipeya, bunjo oi uri yonore miya? Ninigo bunoine igogaru qoqomuku gobun, oi yonore eru miya. ¹⁹ Bunjo ore funine oi inji none taningagobenen: Yonoji Anutu so mane-

* **3:15:** Kiki 95.7-8 * **3:16:** Jare 14.1-35

sin garu qoqomuku ebuŋ ore eru yonɔyanunde morengo ropeiŋgo embimbingabuŋ. Onu.

4

Anutuji kufufuŋine ɲeɲe mane komban noreiŋ.

¹ Anutureo roperu womoo ɲemane ekiminde buŋo kipeya, buŋo oiji sanan qanqanine pe norega. Ore eru ɲonɔreone moji wirieru inɔyonunde Sombuŋ kadi raraine oi botuineo ketigako onuine bofuknoben. Ore eru botunonɔngo sisiŋan einoben. ² Moren buroineo warebi Bobian Biɲe mitaninŋa norebi onuine mibi manebunyon, buŋo oi omaine sakiji sowo manebi manyanɔngo so rakaya. Ore eru manesinyanɔŋ so fukeko mutu omaine gobi so bapi yaberu jangaru mataeya. ³ Maɲnonɔŋ kerisieru manesiŋ garu gogobenen, nonɔŋ Anutureo roperu ɲema neku senŋinbanŋin gokimiŋ, oi manegobenen. Anutuji ore Biɲe buŋoine oi inɲi mime pega,

“Onu miku yomben paiineo buŋone mitigaru mimipan buŋoneji oi kiperu inɲi mibon, ‘Nema neku goniminde buru rua yarebonyon, yonɔji senŋinbanŋin oo so ropenimin.’”

Anutuji Sombuŋ moren bofuke yapeko daman oone fungaru senŋinbanŋin morenine ba forebi pegayon, jibu buŋo onu miya.* ⁴ Anutuji una 7:de buŋo mime Biɲe Qurande mobe mogo inɲi pega, “Una 7 fukeko Anutuji gioine sosowo ba foreya ore ɲema neku komban ɲeya.”* ⁵ Anutuji Biɲe

* 4:3: Kiki 95.11 * 4:4: Jen 2.2

buɲo oi jikigaru inji mime pega, “Nema neku goniminde buru rua yareboɲyoɲ, yoɲoji seɲgiɲbaɲgiɲ oo so ropenimiɲ.”*

⁶ Niɲigo goineji Anutуре seɲgiɲbaɲgiɲ bofukeru ɲema neku gonimiɲ, buɲo oiji sanan ɲaɲɲaɲine pe norega. Bobian Biɲe ronekoɲ kufufuɲ mitaɲinga yarebuɲ, yoɲoji ɲoɲomukuyaɲunde eru seɲgiɲbaɲgiɲ maɲgo so rosiru so gobuɲ. ⁷ Nema so ɲebuɲ ore eru Anutuji moke damaɲ mo ruaru tinaine ‘Damaɲ muɲambe yo,’ oɲu miya. Damaɲ joroine tariko damaɲ ore Biɲe buɲoine muɲambe yoo miku ɲuraɲgago oi Deiwid bararaɲgako inji miya,

“Muɲambe yoo Anutuji oɲga ɲaberu buɲo sanu game manegobi ine, maɲ-ɲaɲuɲ eebobo sembeneji so kejiganiɲ.”*

⁸ Oɲu miko Josuaji oga yabeme seɲgiɲbaɲgiɲ maɲineo roperu ɲema nenobuɲ ine, Anutuji damaɲ fuɲine more buɲo oi jiki so mina.* ⁹ Oi so minayoɲ, Anutuji foriine kufufuɲine ɲema nene noreko seɲgiɲbaɲgiɲ bofukekiminiɲ. Buɲo oiji sanan ɲaɲɲaɲine pe norega. ¹⁰ Ore fuɲine oi inji: Anutuji iɲoyoɲunde gio baya ore ɲema neku komban ɲeya, ore so moji Anutуре seɲgiɲbaɲgiɲ maɲineo roperu ɲema neiɲ, iɲoji iɲoyoɲunde gio baya ore ɲemaine oi oɲuakoɲ neku seɲgiɲbaɲgiɲ goiɲ.* ¹¹ Ore eru noɲuɲ Anutуре seɲgiɲbaɲgiɲ maɲineo roperu ɲema neneine bofukeniɲ ore yameɲ keinebeneɲ. ɲoɲoreone moji waki qaku

* 4:5: Kiki 95.11 * 4:7: Kiki 95 * 4:8: Dut 31.7; Jos 22.4

* 4:10: Jen 2.2

kufufuŋ raŋgbaŋine yoŋore qoqomuku kamasi oi akon egu boyobeiŋgo yameŋ keinebeneŋ.

¹² Anuture buŋo oi kekegborere fuŋne eru usuŋineke fukega. Jigore siqo sogo oi mobemobe miineke fukegayon, Anutu buŋoinere mi oiji siqo soguine sosowo yadureru teteine fukeko miine mobemobe oi miineke fukegobire. Buŋo oiji maŋ qoqotinoŋuŋ ketigaru gemoji me Anuture Moroŋi dobe nobeega, oi sikeru bapakare nobeega. Saki fu tife jijikinoŋuŋ eru sianoŋunde wombuŋ oi oŋuakon osoeru buŋonoŋuŋ sumuŋine bofukeru fiine eru sembene boroiŋ yapeega. Maŋ wombuŋonoŋuŋ eru mamane-muku burunoŋuŋ oi osoeru buŋonoŋuŋ mitariega.

¹³ Anutuŋi ya sosowo bofukeko pega oo akon ya mo oi sumuŋineo so peko fiine akon ŋoneega. Ya mo komoŋgabeneŋ Anutuŋi komoŋonoŋuŋ oi soine doduru ŋoneko iŋore jiŋo maio totogo akon pega. Eebobonoŋunde sundu sosowo oi iŋore mitaniŋgakimiŋ ore so fukegobeneŋ. Oŋu.

Yesuji sorin gio sinanŋonoŋuŋ ropekiine goga.

¹⁴ Yesuji sorin gio sinan qoruine ropekiine fuke norega ore eru noŋuŋ “Manesiŋ gagobeneŋ,” miku mifukeegobeneŋ, oo sananŋaru di-mainebeneŋ. Yesu Anuture Madeŋi Sombuŋ koroine koroine yadureru roperu ŋega. ¹⁵ Maŋ mamanesunoŋuŋ goine wiriine fukeko sorin gio sinan goineji ore eru beusembe so enoreegobiyon, noŋunde sorin gio sinanŋonoŋuŋi fuŋine mo iŋi fukega: Inoji noŋuŋ oŋuine eebobo sosowo oo noŋuŋke kamasi moakon esoi eteru gobuŋyon, oi jibu agiburaŋ mo so eya.

¹⁶ Sorin sinan̄non̄un̄ji paibe yaun̄moririre nējeo neku non̄emaīn noreīngo maneega. Ore eru koimo paīneo dimaku in̄ore bembengo rainebenēj. In̄ore bembengo rabenēj yaun̄moririre embim̄bingagobenēj, ore daman̄ine poretīn oo bapi nobeko oi soine bofukekimin̄. On̄u.

5

Sinan̄ qorunon̄un̄ Yesuji bapi nobeega.

¹ Morende sorin̄ gio sinan̄ qoruine sosowo oi n̄in̄igo botuyan̄ungone roosoe yaberu gio in̄i banimin̄ ore igodon̄ yabeegobenēj: In̄oji n̄in̄igo minebobonon̄un̄ fukeru Anutuke man̄moakon̄ eru gokiminde gio baku agiburan̄ eben̄ ore joma yaun̄ine yaun̄ine oi Anuture ruaru oiji boji rigaega. ² In̄oyon̄unde man̄ mamanesu goinēji on̄uakon̄ wiriine fukega. Ore eru n̄in̄igo qosorieku qanda paīneo tintun̄ eegobi, oi soine beusembe paio enoreega. ³ Wiriine fukega ore in̄oyon̄unde agiburan̄ eru kufufun̄puine yon̄ore agiburan̄ on̄uakon̄ ke keririkein̄ ore jomaji boji rigaega.* ⁴ Moji tinabinē oi in̄oyon̄unde so bine qoqo ein̄yon̄, Anutuji Aron on̄ga teya, ore so in̄o on̄uakon̄ on̄ga tega.*

⁵ Ore so Kristoji on̄uakon̄ in̄oyone sorin̄ gio sinan̄ qoruine fukeinde tinabinē oi in̄oyon̄unde so raugayayon̄, Anutuji in̄i mitigaya, “Goji nonde Made fukende non̄ji mun̄ambe gore Mama fukego.”

* 5:3: Lew 9.7 * 5:4: Eks 28.1

Buño ore so sorin gio sinan qorunonun fukeya.*

⁶ Buño oi akon mime Biñe Qurande mobeine mogo inñ pega,

“Goji Melkisedek onuine sorin gio sinan fukeru daman tatarine tomiri go ropemin.”*

⁷ Yesuji saki fuke morengo goku oo damanine damanine onga wosiru sanan qanqanine ongako jin kuineji wakiko Anutu komegone bomukuingo sanangaya, oi weu teru goya. Weu teru goku Anutu aran baku bujoinere rurumango rurua eku goya ore Anutuji ongawowosiine maneya.* ⁸ Madeine fukeyayon, Anutuji oi jibu joisereren so kipeme paiineo ropeko maneru oo buño rerende fune bofukeru mane sarigaya. ⁹ Oi maneru kuririine sosowo bofukeru senjinbanjin tatarine tomiri gokiminde kukure Rauine fukeya. Ore eru njingo inore mi renkaru gogobi, oi sosowo soine kure yareme senjinbanjin bofukenimin. ¹⁰ Rauine oi fukeko Anutuji oi Melkisedek onuine sorin gio sinan qoruine fukeingo mitariru igodongaya. Onu.

Mamanesinde foriji egu jibugainde sinan bobo buño

¹¹ Buño oi soine jikigaru kokoine miku soguenobenyon, nonoji buño maneru boyobenimingo kubanjijino eru tuturi egobi. Ore eru oi mitaninnga narekimingo embinqombin egobenon. ¹² Nonoji daman joroine kufufun rangbanjine goku soine daman yoo qaqaji

* **5:5:** Kiki 2.7 * **5:6:** Kiki 110.4 * **5:7:** Mat 26.36-46; Mak 14.32-42; Luk 22.39-46

fukeniminde so fukenobunyon nɔŋo-nɔŋe Anutire buŋo korun funfunɣaine oi moji neɲeineo moke qaji nareinɔ embimbiŋgaegobi. Nɔŋoji qunɣaru Biɲe buŋo oi moŋ onɔuine noiŋgo maneegobi. Uqo sananɲine onɔuine oi noiŋgo embimbiŋgaegobi.* ¹³ Moji oi moŋ onɔuine noku goga, iŋoji jikigaru made gbio onɔuine fukega. Anutire jinoo posiine fukekiminde buŋo qaji narebenyon, iŋoji ore funɲine so mane mukuru mo goga.

¹⁴ Made gbio onɔuine gogayon, uqo sananɲine oi nɲinigo mamaneɲanunji sogueya, yonɔoji nonimin ore eru pega. Nɲinigo Biɲe buŋo jijiiki kegboreru gobi maŋ mamaneɲanunji kerisie foreko soine afagaru mosi sosowo osoeru fiine eru sembene boroin yaperu fiine boyobeegobi. Uqo sananɲine oi yonore eru pega.

6

¹ Ore eru Kristo funɲnere buŋo korun funfunɣaine mane foreru oo so qunɣainebenenɲ. Onu matayon, jikigaru sogueru kuririnoŋunke fukekimin ore yameŋ keku goinebenenɲ. Mamanesinde otun sari foreru oi neɲeineo moke so funɣaru sariinebenenɲ. Otun oi maŋ-nanunɔ inɲi igodonɣabenɲ: Eebobonoŋun komekiine bokeru maŋnoŋun kerisieru Anutu manesin gabenɲ.

² Maŋnoŋun kerisiebenenɲ mamanesinde buŋo mobeine mobeine inɲi qaji norebi manebenɲ: Ag-iburaŋnoŋun keririkenimin ore miti meso eru

* 5:12: 1 Kor 3.2

munanqoqo funne funne ore funine qaji norebun. Meyanun painonunگو ruruare funne qaji norebun. Gboreru komegone pakerekiminde funne qaji norebun. Anutuji bunononun mitariko daman tatariine tomiri sanan qanqanine peinde funne qaji norebun. ³ Mamanesinde otun onu igodonqaku jikigaru rengaru mamanoonun sogueingo maneinebene. Anutuji usunine noreega ore so kuririnoonun sosowo bofukeingo yamen keku dimainebene.

⁴ Onu dimaingo maneru oo qungaru egu wakikimin ore eru dimagobene. Ninigo injiine oi manyanun kerisienimin ore oga yabeingo embimbingaegobene. Goineji manyanun daman mogo tamaeko Anutuji Sombun yaunine yareme maneru jeriebi Moro Tiriineji sabe yabeme gobun. ⁵ Anutune Bine bunore ani manebi senjinbanjin daman jikiinere usunji manyanunگو rakame manebun. ⁶ Oi sosowo mane takireku mamanesinyanun bokero Anutu nadi gabun. Ninigo onuine oi manyanun moke kerisienimin ore oga yabekimingo embimbingaegobene. Yonjo Anutune Made igosisi eteku njeneineo moke maripongo qaqa onuine baba waki eru totogo mimiganan eteegobi. Onuine oiji Kristo tumoqoqoo miku mimiganan eteegobi.

⁷ Oi soso bunjo injire so: Kueji daman kokoine keku moren paiineo wakiru manineo rakaru moren bodogako gio rauinere kinanqoqopuji ugo saribi Anutuji moren mifiame foriine fukeko sasari rau yonjoji oi roru rounyanunگو ruaegobi.

⁸ Onu ruaegobiyon fobu eru wou joruineke oiji morengo fukeru wapeega, moren oiji yau fukega. Rauine yonjoji oi sowegaingo maneru yamen keku odigabi foriine so fukeko noneru tatariineo rigabi jain.*

⁹ O yoro ogopune, ninjoji soso bujo onu migobeneyon, oi jibu nono man-ñanun kerisieru gonimin ore manyoka so egobenen. Nonore mango Biñe buñore foriji fukeru sogueingo maneru koimo dimagobenen. Anutuji foriine oi noneru bomuku ñabeme qowirieru Sombungo ropenimin. ¹⁰ Anutuji dukun beukoro paio kekesiine so fukega. Nono Anuture ninigo gbagbataenine bapi yaberu go waperu jikigaru bapi yaberu gio baku goegobi. Onu manjokonanjun Anutu odubi tinabinjeineji sogueega, inoji gionanjun eru manjokonanjun ore eru so niga gako furiine bokirie ñarein.

¹¹ Nonun senginbanjin fukekimin ore origaru oo koimo manyoka tomiri dimanimin ore aninonun maneru inji anj sogo maneegobenen: Nono bubu Anuture manjo eegobi, oi akon jikigaru noduru goinebi. Kuririnanunke fukekimin ore yamen keku morengo go foreniminde so oo so wirieinebi. ¹² Qefen egu fukeminin ore anj sogo maneegobenen. Anutuji senginbanjin ya noreinde bujo kipeya, goineji Anutu manesin garu joisererenyanun maneku karieru onjuine oiji oi raugaegobi. Nonoji yonore mosi boyobeingo manegobenen. Onu.

Anuture mimipan bujo oi manyokaine tomiri.

* 6:8: Jen 3.17-18

¹³ Anutuji Abraham jojofo buño oteru oi injoyonunde tina miku mimipan buñoineji misanangaya. Moji Anutu odureru ropekiine gona, soine inore tina minayon, onuine mo so goya ore injoyonunde tina miku mimipan buñoine misanangaya. ¹⁴ Mimipan buñoine oi Abrahamde ini miku ojiya, “Nonji foriine mifia garebemin O foriine osigidapugo garebe sauenimin.”*

¹⁵ Onu ojime Abraham ya oteinde buño mipangame peya, inoji oi foriineke fukeingo yamen keku odigaru goku foriine raugaya.

¹⁶ Ninigoji soguneyanunde tina miku mimipan buño mibi maneegobi. Mimipan buñoyanunji buño migobi, oi basanangako kepienimingo ore embimbingabi buño mimiyanunji tariga. ¹⁷ Ore so Anutuji buñoine Abrahamde osigidapu nonun manekimin ore mipangaru miya. Buño buruine oi moji kepieru qopieingo embimbingaga, osigidapuine nonun mimipan buño ore funjine oi poretin mane mukukimingo maneya. Ore eru jojofo buñoine ojime funfungaine fukeko buño oi moke mimipan buñoineji misanangako ateine yoyoka fukeya.

¹⁸ Anutuji buño oi miku ore ikoine miingo embimbingaya. Inoji buño ikogoine tomiri oi miku misanangaya, oiji mannonun kitingaingo maneya. Ore eru miku oi misanangaya. Nonun morende eebobo sembeneone kamieru Anutureo roperu senginbangin norein ore oori noreya, oi qin keru odigaru gogobenin. ¹⁹ Senginbangin fukekimin ore eru odigaru ore manyoka mo so eegobenin

* **6:14:** Jen 22.16-17

Oorinoŋuŋ oiji maŋnoŋunde nigiŋ boyobiŋineke kamasi oŋuine fukeru niŋo Yesuke kipe nobeega. Oorinoŋunde nigiŋ boyobiŋineke joroine oiji niŋoreone fuŋgaru Sombuŋ sorinŋ kubainere maŋgo roperu sorinŋ maŋine mobemobe bo-tuyakuŋgo kambaŋ dobu pega, oi oŋuakoŋ peti-garu jikigaru Yesu morumboŋ neŋe mokiineo pega, iŋoreo raga.* ²⁰ Yesuji minebobonoŋuŋ fukeru bonieru paibe roperu morumboŋ neŋeine roru damaŋ tatariine tomiri ne ropeinŋ. Oŋu Melkisedek oŋuine sorinŋ gio siŋaŋnoŋuŋ qoruine fukeru goga. Oŋu.*

7

Sorinŋ gio siŋaŋ Melkisedekre binanŋ

¹ Melkisedek ŋi oi kae tinaine Salem ore kiŋ koito fukeru Anutu ropekiinere sorinŋ gio siŋaŋ goya. Oŋu gome Abrahamji kiŋ koitoine koitoine jigo qaku gbiŋ eyareru kirieru moreŋineo wareya, damaŋ oo wareru Abraham bofukeru mifia teya.*

² Mifia teko meboine sosowo boroŋgaru tengone moakoŋ moakoŋ 1/10 roru pesiŋine ruaru oteya. Melkisedek tina ore fuŋine oi “Eebobo posiinere kiŋ koito.” Tinainere so rone “Eebobo posiinere kiŋ koito” fukeya eru jikigaru oŋuakoŋ “Salemde kiŋ koito” goya. Salemde kiŋ koito tina ore fuŋine oi “Womore kiŋ koito.” ³ Melkisedekji maŋgomamaine tomiri, daritifepuine tomiri, fufuke damaŋine tomiri eru

* **6:19:** Lew 16.2 * **6:20:** Kiki 110.4 * **7:1:** Jen 14.17-20

komeine tomiri.* Onu sorin gio sinan qoruine fukeru daman tatariine tomiri go ropein. Inoji Anutуре Madere kamasi onuine fukega.

⁴ Miminenoñun Abrahamde arambobo mosiji Melkisedekre funne yaduko oi ini none mukuinebi: Abraham inoyone mebo ya kuririineke kigaku roru wareya, oone me yoyoka (10) sosowo osoeru mobeine moakon roru Anutуре pesin ruaya. Ore eru Melkisedekji foriine ropekiine yobu funne mo fukega.

⁵ Anutuji Kadi bunoo bunjo ini mitiga noreme pega, “Liwaire osigidaone ni igodon yabebi sorin gio bobo Liwait fukebi kufufun yonoji meboyanun me yoyoka (10) sosowo osoeru oone mobeine moakon roru Anutуре pesin rua yareeinebi.” Yonoji nono onuine Abrahamde osigidapu fukegobiyon, oi jibu yonoyanunde kufufunpu nonore meone pesinnonun oi raugaenimin.*

⁶ Mimiti bunjo onu pegayon, Melkisedekji Liwaire osigida mo so fukega. Oi jibu Abrahamji Anutуре jofo bunjo mane sabareku goku meboine osoeru tengone moakon 1/10 roru Anutуре pesin ruaya, oi raugaru mifia teya.

⁷ Sogunenonunde mea yukuo gogobenen, yonoji mifia norebi gogobenen. Bunjo oi mugakimin ore embimbingaegobenen.

⁸ Kufufun nonun tengone moakon 1/10 roru Anutуре pesin ruaegobenen, oi morende sorin gio bobo Liwait yonoji raugaegobi. Yonoji

* **7:3:** Biñe Bunoo Melkisedekre mangomama eru daritifepu, fufuke eru kome damanine oi so mitaningaga. * **7:5:** Jare 18.21

morengo goku komeegobiyon, Sombungo paibe more kitingaku mibi sanangaru go ropein, inoji oi raugaega. ⁹ Abrahamji meboine osoeru me yoyoka sosowo oone mobeine moakon 1/10 roru Anuture pesin ruaya, inoji oi osigidaine Liwaire onuakon bonieru ruaya. Onu mibenen soine sagana. Daman yoo tengone moakon 1/10 roru Anuture pesin ruaegobeney, oi nasononun Liwaire osigidapuji raugaegobi. ¹⁰ Onuakon igokoine Liwai fukein ore manesuku inore pesin ruaya, ore funine oi inji: Liwaiji nasoinere saki fugo peko Melkisedekji daman oo wareru Abrahamke qoturebu. Onu.

Melkisedek oi Yesure soso fukega.

¹¹ Anutuji Kadi bunoo Israel kufufun mitiga noreko ore so Liwai kubuone ni igodon yabebe sorin gio sinanonun fukeegobi. Gio oi babi onuine oiji kuririnoonun sosowo bofukeneney ine, nonun sorin gio sinan funine more so embimbanganobeney. Gio ore foriineji so sagaya ore eru Yesuji Melkisedek onuine fukeya. Ninigoji oi Aronde burure so onu so igodongabi fukeya. ¹² Sorin gio sinan gionere funeji kepiega daman oo Kadi bunoji onuakon kepiega. ¹³ “Sorin gio sinan funine mo,” bunjo oi Ofonnonunde migobeneyon, inoji Liwai kubuone matayon, kubu mogone fukeya. Kubu ore ni moji boji sorinde alatao dimaku gio so baku goya. ¹⁴ Ofonnonunji Juda kubuone fukeya, bunjo oi totogo pega. Mosesji Juda kubu yonoji sorin gio sinan ganiminde bunjo mo so miya.

Sorin gio sinan Melkisedek onuine mo

¹⁵ Ore eru sorin gio sinan mo Melkisedekre kamasi onuine fukega, oiji buño migobenende fori oi totogo akon yaduko sagaga. ¹⁶ Inoji moren ninigoji Kadi buño boyoberu kubuinere so mitigabun ore eru sorin gio sinan so fukeyayon, gogo sananine so jibugain, ore usunineji mango eteko sorin gio sinan fukeya. ¹⁷ Moji inore funne kitingaku miko Bine Qurango ini pega, “Goji Melkisedek onuine sorin gio sinan fukeru daman tatariine tomiri go ropemin.”* ¹⁸ Anutuji onu miku mimiti funfungaine oi igogaya. Buño funfungaine ore usunineji mataeme bapi nobeingo embimbingaega, ore eru oi igogaya. ¹⁹ Kadi buñoji ninigo kuririnoñun bofukekimin ore so bapi nobeya. Mata. Ore eru buño buru funfungaine qomukuru tifeineo oori fine yobu noreega. Noñun oori ore paio dimaku soine Anuture manfungo raru onga wosiekimin.

²⁰ Anutuji sorin gio sinan gariinere buño miku oi mimipan buñoineji misanangaya. Onu eyayon, sorin gio sinan goine yonore buño oi mimipan buñoji so misanangabi jibu onu ebuñ. ²¹ Goineji sorin gio sinan mo fukebunyon, Anutuji Yesu igodongaru buñoine oi mimipan buñoineji misanangaru ini ojiya,

“‘Goji sorin gio sinan fukeru daman tatariine tomiri go ropeigon.’ Ofonji mimipan buño misanangaya, buño oi moke so kepiein.”*

²² Mimipan buño ore eru Yesuji jojofo buru gariinere fori fukeinde sinan fukeru dimaga. Onu

* 7:17: Kiki 110.4 * 7:21: Kiki 110.4

Anutu eru ɲɲigo botunoɲungo gio baku goga. Jojofo buru oiji rangbanine odureru fine yobu fukega.

²³ Sorin gio sinan goine oi ronekon kokoine gobun. Komeru gioyanun jikigaru bain ore embimbingabun, ore eru oi kokoine gobun.

²⁴ Yonjoji kokoine gobunyon, Yesuji daman tatariine tomiri go ropein, ore eru sorin kubainere sinan gio oi tatariine tomiri baku go ropein.

²⁵ Gio oi baku goga ore eru Yesuji ɲɲigo inoreo warebi oga yabeme Anutune manfunjo raegobi, oi soine sanangaru munan qa yareko bunoyanunji komeega. Daman so yonore eru Anutu onga wosiega ore goga, ore eru soine munan qa nore foreega.

²⁶ Sorin gio sinan qoruine onjuineji soine saga nobeega. Inoji tiriine bakare bunjo tomiri eru gbagbataenine fukega. Anutuji Yesu agiburan ɲɲigo nonundeone roosoeru ogagame Sombun koroine sosowo petigaru paibere paibe roperu funine mo fukeru goga. ²⁷ Sorin gio sinan goineji ateine ateine rone yonoyanunde agiburande eru ore ndio kufufun yonore agiburande eru jo-maji boji rigaru gobun. Yesuji inoyonunde saki fu kisingako boji ririga onjuine etebi onjuine oiji kufufun nonunde agiburan oi ate moakon oo akon keririkeme saga foreya. Ore eru Yesuji oi sorin gio sinan goine onjuine daman so eenjo so embimbingaga.*

²⁸ Anutuji Kadi bunoine Moses oteme ore so ɲɲigoji ɲi oi igodon yabebi sorin gio sinan

* 7:27: Lew 9.7

qoruine fukeegobi. Moren̄ n̄i yon̄oji usun̄yanun̄ tomiri gogobiyon̄, Anutuji sen̄gin̄ban̄gin̄ fukekiminde bun̄o oi jiki noreru oi mimipan̄ bun̄oineji misan̄angaya, ore so Madeine igodon̄garu qorunon̄un̄ fukega. Qorunon̄un̄ in̄oji kuririine sosowo bofukeru daman̄ tatariine tomiri san̄anine go roperu goin̄. On̄u.

8

Jojofo buru gariinere sorin̄ gio sin̄an̄ qoruine

¹ Bun̄o migobenen̄ ore bun̄o korun̄ qoruine oi in̄i: Non̄un̄ sorin̄ gio sin̄an̄ qorunon̄un̄ke fukegoben̄en̄. Qorunon̄un̄ in̄oji Sombun̄ kaeo roperu Ropekiinenon̄unde morumbon̄ n̄ene keririn̄ineo me furoineo n̄ega.* ² Kamban̄ seri sorin̄ forine oi Sombun̄go pega. Oi moren̄ n̄iji babaine matayon̄, Ofon̄ji in̄oyon̄e oi baya. Sorin̄ gio sin̄an̄ qorunon̄un̄ in̄oji kamban̄ seri sorinde man̄ine aribe tin̄aine mokiine yobu oo goku Anutu kin̄an̄ qateinde gio baega.

³ Morende sorin̄ gio sin̄an̄ qoruine sosowo oi pesin̄ yaun̄ Anuture ruaru jomaji boji rigaru gonimin̄go igodon̄ yabeegoben̄en̄. Ore so sorin̄ gio sin̄an̄ qorunon̄un̄ Yesuji on̄uakon̄ in̄oyon̄e Anuture pesin̄ rua oteya. ⁴ Mosesre Kadi bun̄ore so pesin̄ yaun̄ Anuture ruaenimin̄ ore n̄i igodon̄ yabebi gogobi. Ore eru sorin̄ gio sin̄an̄ qorunon̄un̄ oiji moren̄go gona ine, in̄oji morende sorin̄ gio sin̄an̄ fukein̄go embimb̄ingana.

⁵ Morende sorin̄ gio sin̄an̄ yon̄oji morende boji sorin̄go Anutu kin̄an̄ qateinde gio baegobi.

* 8:1: Kiki 110.1

Sorin oiji Sombun sorin kubainere soso eru sasako fukega. Mosesji sorin kubaine kamban seriji baingo eya, daman oo Anutuji Sombun sorininere buru oi bararinga teya. Odu foreru sinan bobo bunoine ini ojiya, “Mane, tukuo gokande buru gadube, ya sosowo ore so poretin boyoberu baigon.” Ore so kamban seriji boji sorin kubaine bako oiji Sombun sorinde wawakine fukeya.* ⁶ Anutuji senginbanjin fukekiminde jojofo bunjo gariine noreko oiji jojofo bunjo rangbanine odureru fine yobu fukega. Jojofo bunjo oiji buru gariinere otun fukega. Jojofo buru gariine oiji buru rangbanine odureru tinabineineke fukega. Tinabine ore so Yesuji jojofo buru gariinere gio fine yobu oi raugaru Anutu eru ninigo botunonungo dimaku bapi nobeega. Gioine oiji morende sorin gio bobo oi kokoine odureru kuririineke fukega.

⁷ Jojofo buru funfungaineni bakare bunoine tomiri fukeru sagana ine, jojofo buru jikiineji fukeingo mo so odiganoben. ⁸ Onuyon, ninigoji jibu sembeabi Anutuji funneyanun bofukeru miyareru ini miya,

“Ofon nonji ini mitigago: Manenin! Daman mo ware fukein, oo Israel kubu eru Juda kubu nonjoke jojofo buru gariine ebemin.*

⁹ Nonji apa nasopunanun menanunji roru Ijipt kantrione oga yabebe sakibe warebi yonjoke jojofo buru ebonyon, yonjoji nonde jojofo buru oi so qakatoru rengabun. Ore eru nonji onuakon oi nadi yabebon. Ofon

* **8:5:** Eks 25.40 * **8:8:** Jer 31.31-34

- nonji onu mitigago. Jojofo buru gariine ebemiṅ, oi Biṅe buṅo raṅgbainere so mata.
- 10 Onu matayon, daman oiji ware fukeme Ofon nonji Israel kufufun yonoke jojofo buru gariine inṅi eru mibemiṅ: Nonji nakene Kadi buṅo sosowo oi yonore mamane-sugo ruaru manyanunṅo quran onjuine qurangabe peine. Onu eku yonore Anutu fukebe yonoji nonde kufufun fukeru gonimiṅ.
- 11 Damani oo soguine eru mendaine oi sosowo nonde funṅe mane mukuku gonimiṅ. Ore eru qaqaji moji Ofonde funṅe manenimiṅ ore botuyanunṅo so qaji yareru goinṅ. Kakaineji gboine inṅi so ojiinṅ, ‘Goji Ofon mane mukuigonṅ.’
- 12 Inṅi ore nonṅ mane muku nuru gonimiṅ: Nonji eeboboyanunṅ sembene oi jureru bokebemiṅ. Agiburanyanunṅ niga nuko oi so jikigaru manesubemiṅ.”
- 13 Anutuji jojofo buruine jikiinere eru “Gariine” miku onjuine oiji jojofo buru funfunṅainere “Oi raṅgbaṅine fukeya,” miko funṅine onu fukeya. Buṅo buru moji daman joroine peku raṅgbaṅine fukega, oiji jibugainṅo ega. Onu.

9

Morende kambaṅ seri soriṅgo Anutu inṅi miteṅ gabunṅ:

- 1 Anutuji jojofo buru funfunṅaine ruaru oo onuakonṅ ohoweine baku miteṅ gakiminde buru oi mitigako boyobebunṅ. Oi boyoberu moreṅgo

kamban seri sorin kubaine babi peya. ² Anutуре kamban seri sorin kubaine oi ini babun: Sorin manine funfunaine oo lambere neje eru poron kubaine oi Anutуре jinо maio uqо nejeо Anutуре binе ruabi neya. Sorin manine ore tinaine oi sorin manine tiriine.* ³ Ore nadiineо manine mo tinaine sorin mokiine yobu oi peya. Sorin manine yoyoka yokore botugo kamban dobu dimaya.*

⁴ Sorin manine mokiine yobu oo jun jinan ririgare koro alata eru jofofo burure katapa oi ebu. Alata oi goulji babaine eru katapa sakiine oi sosowo goulji kefagakiine fukeya. Paora tinaine mana oi goul deroо ruaru katapa ore mango sinan gaegobun. Onuakon Aronde toku gbaru gidaine popouine eru Anutuji jofofo buruine kogo qurangkako sipaine oi katapa ore mango sinan gaegobun. Katapa mango ya yokaomo oi onu pebun.* ⁵ Katapa paiineо jonu mimereren yoyoka goulji babaine oi dimabu. Oi Anutuji manfunго goko kuririquaninere soso fukeya. Jonu yoyoka oi toyakun qorumureru katapa iporoine kefagaru dimabu. Katapa iporoine oi Anutуре keririkeinde neje fukeya. Bunо moakon moakon oi daman yoo bubu poretin mimane ekimin ore so mata.*

⁶ Anutуре kamban seri sorin kubainere ya sosowo oi onu burugabi eko sorin gio sinan yonoji daman so sorin manine funfunaine oo roperu Anutu kinan qateku gioyanun baku gobun.*

* **9:2:** Eks 26.1-30; 25.31-40; 25.23-30 * **9:3:** Eks 26.31-33

* **9:4:** Eks 30.1-6; 25.10-16; 16.33; Jare 17.8-10; Eks 25.16; Dut 10.3-5 * **9:5:** Eks 25.18-22 * **9:6:** Jare 18.2-6

⁷ Onu gobunyon, sorin gio sinan qoruine inoji akon gosa so ate moakon oo sorin manine mokiine yobu oo roperu goya. Dari roru oo roperu inoyonunde eru kufufun yonoji qaqouma paio agiburan ebu, ore eru boji rigaru dari keseme wakiya.*

⁸ Onu burugaru ruabi Moro Tiriineji soso oi oduru oiji ninigo ini qaji noreru goya: Sorin manine funfunaineji jikigaru dimaga, daman oo Anutuji sorin manine mokiine yobu ore funine oi totogo so bararinga yareko gobun. ⁹ Bujo oi daman yoore soso fukega. Funine oi ini: Ninigoji yaunine yaunine pesin ruaru boji roru warebi rigaegobiyon, manyanunji jibu womo bofukeningo embimbinaegobi. Manyanunji agiburan ebu ore eru kejigako boji roru wareru Anuture sorin kubaineo roperu onga wosiego-biyon, oiji agiburanyanun keririkenimingo embimbinaegobi.

¹⁰ Ugo yaun eru obu yaun roru wareru raqo warego ebi miti meso fune fune eyareegobiyon, onu sakire mimiti oi akon boyobeegobi. Ya oi rone sagako eru gobunyon, Anuture buru gariinere damanji ware fukeme oo akon fungaru so jikigaru sagain. Onu.

Kristo dariinere fune

¹¹ Kristoji wareru senjinbanjin noreega ore sorin gio sinan qoruine fukeya, inoji morende kaman seri sorin niji babaine oo so ropeya. Onu matayon, Sombungo sorin kubaine pega, oo ropeya. Sorin kubaine oiji ropekiine funine

* **9:7:** Lew 16.2-34

mo fukega. Kuririquṛaṇineji oi qembibiineke.
¹² Oo roperu sorin maṇine funfunḡaine petigaru nonin eru bulmakao madeine yonore dari so roru raya. Onu matayon, inoyonunde dari keseme oiji maṅgo eteko Sombunde sorin maṇine mokiine yobu oo ropeya. Oo daman moakonde so ropeko saga foreko pega. Duenonun onu baru senginbanḡin fukekimin ore kesueko daman tatariine tomiri sagaru pe ropein.

¹³ Rone moreṅgo nonin eru bulmakao ni yaberu dariyanun roru wareru bulmakao nigo jenonine oiji boji rigaru ore komeine onuakon roru wareru ninigo bopeborinyanunke oiji igokuru garu rau yarebi saga yabeya. Onu munan qa yarebi oiji sakiyanun jureru bagbagbaga yabeme gobun.* ¹⁴ Onu ebuṇ ine, Kristore dariji daman yoo munanqoqo kamasi oi kokoine odureru inḡ enoreega: Dariineji mannonun kejiḡako oi jureru eebobononun kome sananinere binḡ fukekimin ore so oi keririkeega. Onu enoreko gogo Rauine Anutu kinan qateinde gio oi afagaru baku gokimin. Moro Tiriineji go waperu tatariine tomiri go ropein, inoji Kristo bapi gako bakaine tomiri goyayon, nonunde eru inoyone kikisin ee eru Anuture boji lama fukeya.

¹⁵ Funine inḡ ore Kristoji jojofo buru garinere sinan qoruine fukega: Anutuji ninigo senginbanḡin fukeru daman tatariine tomiri onuine gokiminde buṅo kiperu onḡa yabeya, yonoji ya oi rauganimin ore manega. Ore eru Kristo igodonḡako Anutu eru ninigo botunonunḡo

* **9:13:** Lew 16.15-16; Jare 19.9, 17-19

manmoakon ekiminde gio baku goga. Jojofo buru funfungainere damango ninigoji kadi odureru agiburan ebi oiji kipe yabeko gobun, Kristoji oi oone pirue yabein ore eru komeru dueyanun baya.

¹⁶ Moji yareyaine sosowo gogoine tariin, daman oo ogoinere binje fukein ore mitigame bunjo pega, ogoineji ya oi pipa so roin. Pipa matayon, bunjo rauineji komeko funineji totogo fukeme nonebi daman oo oi soine roin. ¹⁷ Gariine gome daman oo bunjoine oiji foriineke so fukeinyon, bunjo rauineji komeko bunjoine oiji usunineke fukein. ¹⁸ Bunjo ore so jojofo buru funfungainere oi onuakon joma dariine so kesenobun ine, foriineke so fukena.

¹⁹ Buru funfungainere fori oi inji fukeya: Mosesji Kadi bunjore mimiti bunjo sosowo oi kufufun sosowo yonore oseru nadiineo bulmakao madeine eru nonin yabeko dariyanunji wakiya. Wakiko oi roru obuke qodureru lama sikiine boboron yojunjiru roru ondu sisiineo kiperu dario igokurugaru tieko Kadi bunjo Quran lama sakiineo qurangaru poporingabun, oi rau teya. Oi rau teru kufufun sosowo botuyanungo roregaru dari obuo igokurugaru tieru bokeme oiji rau yareya.*

²⁰ Onu rau yareru inji yajiya, "Anutuji bunjoine renganimin ore mitiga nareru nonoke jojofo ega ore dariine yo."

²¹ Onu yajiru jikigaru kamban seri sorin kubaine oi onuakon dari oo igokurugaru bokeme rau teya. Munanqogo gio baniminde kuriri yareya sosowo oi onuakon igokurugaru bokeme rau

* **9:19:** Eks 24.6-8

teya.* ²² Anutüre Kadi buṇoji mitiga ore so oi me oi sosowo oi dariji jurebenenḡ bagbataenine fukeega. Ore eru moji dari so kongana ine, Anutuji agiburaṇṇonun so bokena. Onu.*

Kristore dariji agiburaṇṇonun keririkeega.

²³ Morende sorin kubaine oi Sombunde sorin kubainere soso eru sasako Moreṅgo sorin eru ore merofu eru jonu oi boji ririga eru onuine oiji munan qa yarebi gbagbataenine fukebi sagayayon, Sombun sorin kubainere yareya ore oi so sagaga. Ore eru Kristoji boji ririga funine mo eya, oiji Sombun soringo roperu ore yareyaine sosowo munan qa yabeko gbagbataenine fukebi sagaya. Boji ririga funine mo oiji morende boji ririga oi odureru bibiineke fukeya. ²⁴ Ore funine oi in: Kristoji boji sorin manine mokiine yobu niji babaine oo so ropeya. Morende sorin kubaine oi Anutüre sorin kubaine foriinere sasako fukeya. Kristoji Sombun kae foriine oo roperu daman yoo bapi nobeein ore minebobononun fukeru Anutüre jinjo maio fukeega.

²⁵ Morende sorin gio sinan qoruineji gosa so joma dariyanun roru boji sorin manine mokiine yobu oo roperu goya. Kristoji ore kamasi so eega. Inoji Sombun kaeo ate kokoine so ropeya. Anutüre boji lama fukeko gosa so qaenimin ore eru paibe so ropeya.

²⁶ Ate moakonji so sagana ine, ino Anutuji Sombun moren bofuke yapeya, daman oone fungaru joisererenine bibiineke maneko ateine

* **9:21:** Lew 8.15 * **9:22:** Lew 17.11

boakon fukena. Onu matayon, morende damanji tariingo eme daman yoo ateine moakon akon agiburan keririkein ore eru fukeya. Fukeru inoyone boji ririga onuine eteniminde eru rurua eya. ²⁷ Moren ninigo nonunde buru oi ini pega: Nonun daman mogo komekimin eru ore ndio Anutuji bunononun osoeru mitari norein.

²⁸ Buru ore so Kristoji onuakon ninigo boakon nonunde agiburan keririkein ore ateine moakonde so wareru inoyone boji ririga onuine eteniminde eru rurua eya. Inoji daman mogo kirieru warein. Agiburande eru moke so wareinyon, ninigo fukeinde ore odigaegobenin, nonun senginbanjin noreru oga nobein ore eru fukein. Onu.*

10

Ate moakon komego rurua eko saga foreru pega.

¹ Kadi bunjo rangbanine oiji senginbanjin fukekiminde fune foriine oi so fukeyayon, senginbanjin fukeinde sasako oi peya. Anuture Kadi bunore fune onu pega ore eru ninigo Anutu mitein gakimin ore sorin kubaineo daman so ropeegobi, yonoji qowirieru kuririyanjke fukeningo embimbingaegobi. Yonoji daman tatariine tomiri pesin yaun roru wareru ruaru boji ririga oi akon gosa so jikigaru eru gobunyon, oiji so sagaya. ² Oiji sagana ine, boji ririga oi soine bokenobun. Sorin kubaineo Anutu ohoweine baku mitein gabun yonoji ate moakon

* **9:28:** Ais 53.12

munaŋ qa yabebi gbagbataenine fuke forenobun ine, oŋu agiburanyaunde mimi oi so jikigaru manenobunyaŋ, oi jikigaru manebun. Ore eru joma yaun oi jikigaru pesinyaun ruabun.

³ Gosa so boji rigaru gobun, oiji jikigaru agiburanyaunde mimi oi kegbore yareme gobun.

⁴ Bulmakao ŋi eru nonin yonore dariji agiburan keririkeiŋgo embimbingaega. Oi esoebunyaŋ, qunŋaru go wapebun.

⁵ Ore eru Kristoji moreŋgo wakiru fukeya, daman oo inŋi miya,

“Anutu, goji pesin yaunde eru boji riganimin ore so sase eru gomenyaŋ, moreŋgo gogore saki oi bomogaru nareya.*

⁶ Boji rigaru agiburanyaunde ore eru pesin yaunine yaunine ruaru gobun, oi noneru ore eru so jerieru gomen.

⁷ Daman oo inŋi ojibon, ‘Anutu mane, nonji yoo warego.

Nonde funne oi papia poporinine oo qurangaŋi pega. Ore so gore man anire so eba eku gobemin.’”

⁸ Rone inŋi miya, “Pesiŋ yaun ruaru boji rigaru agiburanyaunji posikein ore ya funne funne eru gobun, ore eru anigoji so fukeko maneru gomen. Oi noneru ore eru so jerieru gomen.” Ya oi Kadi bunjo rangbainere so jikigaru eegobiyaŋ, oi jibu oŋu miya. ⁹ Ore ndadiŋeo bunjo inŋi miya, “Anutu mane, nonji yoo wareru gore man anire so eba eku gobemin.” Oŋu miku Anutu ohoweine baku miteŋ gakiminde funne funfunŋaine oi igogaru

* **10:5:** Kiki 40.6-8

kadi gariine igodongaya. ¹⁰ Anuture man aniji mango eteko sakiineji boji ririga onjuine ebi tariko ore eru roosoe noreko gbagbataenine fuke foreben. Ate moakonde so sakiine kisingaya, oiji daman so sagaru pe ropein.

¹¹ Damanine damanine sorin gio sinan sosowo yonjo dimaku sorin gioyanun baegobi. Jijiki boji oi akon rigaru riga eegobiyon, oiji agiburanyanun keririkeingo embimbinaegobi.* ¹² Oiji embimbinaegobiyon, Sombunde sorin gio sinan qoruline Yesu inoji ateine moakonde so agiburande eru sakiine kisingako daman tatariine tomiri sagaru pe ropein. Morengo boji ririga onjuine dimaku otebi Sombun soringo roperu Anuture me furoineo nega.* ¹³ Oo neku daman botuine yoo Anutuji kisopuine ketungame waki yabeko Kristo kufuinere koji* fukebi kokorian enimin ore odigaru goga. ¹⁴ Ate moakonde so komego rurua eko boji ririga onjuine etebi oiji saga foreko soine ninigo roosoe nobeko gbagbataenine fukekiminde so fukegobenin. Onu soine qowirie nobeko kurironun sosowo bofukeru daman tatariine tomiri onjuine go ropekimin.

¹⁵ Moro Tiriineji onuakon bunjo oi kitingaku miko manegobenin. Rone bunjo inji miko pega:

¹⁶ “Ofon nonji inji migo: Daman goineji tariko oo jojofo buru gariine yonjoke ebemin, oi inji: Nonji Kadi bunjone sosowo oi man

* **10:11:** Eks 29.38 * **10:12:** Kiki 110.1 * **10:13:** Rosipuine bawaki yaberu gbin eru mimi eyarenimin ore kufuyanunji ode-tungaru paiyanungo koji onjuine odemagaru gobun. Juda yonjore funne onu.

wombunyaŋuŋgo ruaru mamanyaŋuŋgo quraŋ onuine quraŋgabemiŋ.”*

¹⁷ Onu miku iŋi jikigaya, “Nonji yonore agiburaŋ eru eebobo jaubaineke ebuŋ, ore eru niga nuko oi so jikigaru manesuku gobemiŋ.”* ¹⁸ Buŋo ore so foriine fukeko Anutuji agiburaŋnonuŋ bokeme buŋononuŋ tariko ore eru agiburaŋnonunde boji rigakiminde kamasi so fukega. Onu.

Anutuke yameŋ keku gokimiŋ ore oŋga noreya.

¹⁹ Ore eru maŋkekerisie ogopunuŋuŋ, Yesure dariji jure nobeko soine Anutire sorin maŋine mokiine yobu oo ropekimiŋ. Onu manesiŋ garu sanaŋgaru manyoka so eegobeneŋ. Mata!

²⁰ Yesuji kadi rarainere kadi gariine bataniŋgame inoyone gogo sanaŋinere kadi fuke noreega. Kadi oi inoyonunde saki kisiŋgaru onuine oiji bataniŋgame pega. Kadi oi oderu Anutire sorinde kambaŋ dobu petigaru sorin maŋine mokiine yobu oo ropekimiŋ. Yesure sakiji maŋgo enoreko kambaŋ dobu oi soine petigakimiŋ.

²¹ Yesuji sorin gio siŋaŋ ropekiine fuke noreega. Inoji Anutire kufufuŋ sosowo siŋaŋ noberu goga.

²² Onu goga ore eru nonuŋ kiko bokeru manyoka sosowo yoberu jijiki akon mamanesiŋ paio dimaku Anutire maŋfuŋgo raru oŋga wosiru goinebeneŋ. Dariineji tieme rau noreru maŋnonuŋ kejigame oi jureme gbagbataeneŋ fukeru goinebeneŋ. Maŋnonuŋji so jikigaru minoreko koimo goinebeneŋ. Obu yagaŋine raubeneŋ bayagaŋ nobeko onuine Anutuke

* **10:16:** Jer 31.33 * **10:17:** Jer 31.34

qakatoru goinebener. * ²³ Anutuji senjinbanjin fukekiminde buŋo kipe noreya, inoji buŋoine daman so boyoberu nonunke dimaga. Onu dimaga ore eru onuine fukekimin ore odigaru oori eru mifukeeinebener. Oo tuturi bokeru qin keru dimaku sanangaru goinebener. ²⁴ Manji jojoko eru eebobo fine ekimin ore manbapakare eku kikitin ee eku goinebener. Onu gokimin ore daman so sisinan ee eku goinebener. ²⁵ Goineji yonoyanunde mankekerisie kufufunde tutuman bokeegobi, nonun mosi ore kamasi so eru goinebener. Onu matayon, Ofon wareinde moge noneru damanineji bombengaga onu manegobener, ore so yamen keku sanangaru manbapakare nadungadun eku goinebener.

²⁶ Biŋe buŋo foriine maneru nonunde anigo agiburan kosa ekimin ine, agiburanonon ore eru pesin boji mo ekimin ore embimbinkakimin. Boji ririga mo oi so bapi nobein. ²⁷ Oi so bapi nobeinon, Anutuji bunononon oi mitariku geoine bokirieme painonungo ropeingo odigaru gburugburu nobeko kokoinonon maneru goinebener. Anutuji kisopuine misi borunineji riga yabein, ore usunine oi akon fukein ore odigaru gokimin. * ²⁸ Moji Mosesre Kadi buŋo nadi gaga oi buŋo koroineo ruabi yoyoka me yokao-moji buŋoine kitingaku mibi buŋoineke fukein ine, oi so nonemain etebi komere biŋe fukein. *

²⁹ Onu fukeinyon, ninigo mo onuine inore bunore urun manesugobi? Moji Anuture

* **10:22:** Lew 8.30; Eze 36.25
Dut 17.6; 19.15

* **10:27:** Ais 26.11

* **10:28:**

Madere buɲo kufuineji odetaparu bokeega. Jojofo buru gariinere dariji roosoeme gbagbataenine fukeyayon, dari oi ya omaine onjuine bawaki eteega eru yaunmoriri Rauine Moro Tiriine oi igosisi eetega. Moji onjuine fukeko Anutuji buɲoine osoeru goine wojimure so oteme sagana? Kadi buɲo qomukuru komere biɲe fukekiminde so fukegobeneyon, Anutuji ɲɲigɔ onjuinere geo oi misi boruɲineke oteko paiineo ropeko joisereren mokemoke yobu maneru goiɲ. Wamo joisererenji saga tena? Injore funɲere uruɲu manesugobi?*

³⁰ Buɲo mo iɲi pega, “Minde mibe, nunde gube, ende ebe oi nonde gio. Nonji ɲɲigɔ buɲoyanunde goine bokiriebemiɲ.” Jikigaru buɲo mo iɲi miko pega, “Ofonji kufufunpuine ɲonjore buɲo osoeru mitariɲ.” Mo moji onju miya, ɲiɲoji oi manegob-eney.* ³¹ Anutu gogo Rauinere jiɲo maio dimaku waki nobeko meineji nobeyi oiji momokiine yobu fukeiɲ. Onu.

³² Egu gbaɲinimiɲ ore iɲi migo: Anuture tatamaji wareko biɲe gaku tamaebuɲ, daman funfunɲaine oi manesuku goinebi. Daman oo mamanesinde jigo qaku joisereren kokoine bo-fukeru oi jibu jogbasasanan eru nadurende gadurebe eru dimaku sananɲabuɲ. Oi so niga ɲabeine. ³³ Daman goineo mimi qa ɲarebi ɲerinetatan manebi tumoqoqoo ɲone dender ɲaberu gobuɲ. Daman goineo ogopuɲanun kamasi onuakon enarebi yonjore keririɲgo dimabuɲ. ³⁴ Goine witi pigo rua yabebi ɲebuɲ, oi ɲone

* **10:29:** Eks 24.8 * **10:30:** Dut 32.35-36

yaberu joisererenyanun moko maneru gobun. Mebo komon-nyanun imasamaken qaku furu robun, oi jeri paio mane sabareku gobun. Sombunde tebe mariku funine mo so jibugain, oi pe narega ore maneru ore eru bobomirin maneru gobun.

³⁵ Ore eru koimonanun daman yoo so bokeinebi. Oi so bokebi Anutuji ore furiine soguine narein. ³⁶ Anutuji ya nareinde bunjo kipeme pega, nonoji oi rauganimin ore dimagobi. Ore eru Anuture man anj boyoberu yobin maneku karieru yamen keku gonimin ine, Sombunde binje oiji nonore binje fukein. ³⁷ Inj ore dimaku sanangaru goinebi: Daman pomponine yobu oi akan jikigaru odigabenen

“Moke warein, injoji ware fukein. Damanine so bojoroko ropeinyon, damaninere so poretin warein.

³⁸ Poretin wareinyon, nonde ogoji eebobo poretin boyobeega, injore mamanesinji manjo eteko sanangaru go ropein. Moke kirieru mamanesinine bokein ine, oi so sagako manneji injore so jeriein.”*

³⁹ Bunjo onu pegayon, ninoji ninigo manyanun moke kirieru mamanesinyanun bokeru misi korure binje fukenimin, yonore kubuo so dimagobenen. Onu matayon, mamanesinononun oi sinan gabenen Anutuji munan qa noreko goku Sombun kaeo ropekimin ore so fukegobenen. Onu.

* **10:38:** Hab 2.3-4

11

Nijigo mamanesinyanunde eru ya inji fukeya:

¹ Mamanesinde funne oi inji: Ya fukein ore origagobenen, oi fukeingo ore sanangaru manyoka tomiri manesin gagobenen. Ya nononeine mata ore so eba eku foriine noneingo odigaru koimo dimagobenen.

² Ronere ronekonjo fungaru nijigo mamanesinyanunji mango eyareko manyanun kerisiebi Anutuji none yabeme sagako mibooro yareme gobun.

³ Mamanesinononunji mango enoreko ya sosowore funne oi inji mane taningagobenen: Anutuji bunjoine mitigaru oiji Sombun eru morende yareya sosowo bofukeya. Ore eru daman yoo ya noneegobenen, oi ya nononeine oone so qowirieru fukeya.*

Abel, Enok, Noa yonjore mamanesin

⁴ Kein (Kain) Abel yokoji Anutture boji riga-bire Abelji manjine kerisieme mamanesinineji mango eteko poretin rengako kondunineji poretin ropeya. Onu ropeko Anutuji bojiine noneko sagako mibooroya. Miboorome Abelji posiine fukeya, Anutuji bunjoine oi kitingaku miko mamanesinineji mango eteko maneya. Onu maneru goku komeyayon, oi jibu daman yoo eeboboine manebenen bunjo oiji jikigaru mannonun bapakareru kitinga noreega.*

⁵ Ni tinaine Enok injoji ronekon manjine kerisieme Anutuji bunjoine kitingaku miboorome maneru injore jinoo sagaru goya. Onu go wapeko

* 11:3: Jen 1.1; Kiki 33.6-9; Jon 1.3 * 11:4: Jen 4.3-10

mamanesinijineji Enok mango eteko Anutuji sakike ogagame Sombungo ropeya. “Anutuji ogagame paibe ropeko jikigaru bofukeingo embimbingabun.” Bije Quran ore so Enok mamanesinijineji sabareko so komeya.* ⁶ Manjine Anuturo kerisiega, inoji bunjo inji manesin gain: Anutuji goga eru Anutuji ninjigo injore jinjo maio sagakiminde baagobi, yonjo furi yarein. Bunjo yoyoka oi manesin garu soine Anuturo manfungo wareinyon, so manesin gaku mo injore jinjo maio sagainjo embimbingakimin.

⁷ Anutuji Noare ya fukeinde sinan bobo bunjo bararinga teya. Bararinga teko Noaji mane tanningaru sombuine funjine mo maneru foriine so noneko mamanesinijineji mango eteko rengaru ogâ baya. Anutuji inoyone eru garikinpuine neji yabeingo ore maneru ogâ oi baya. Noa mamanesinijineji mango eteko ogâ baya, eebobo oiji moren ninjigo funneyanun kekesiine bararinga yareko Anutuji bunoyanun mitariko sibirigabun. Manyanun so kerisieru sibirigabunyon, Noare mamanesinji mango eteko Anuturo jinoo posiine fukekiminde yanun oi raugaya. Ninjigo Anutu manesin gabenen bunononun mitariko posikeegobenen, Noaji ore so posiine fukeya. Onu.*

Abraham Sara yokore mamanesin

⁸ Anutuji Abraham moren mo injore nije fukein ore miku oo rainjo ore onga teya. Onga teko mamanesinijineji mango eteko bunjo oi rengaya. Uro

* 11:5: Jen 5.21-24 * 11:7: Jen 6.13-22

raru ropena oi so maneyayon, oi jibu inoyonunde moren bokeru raya.*

⁹ Raru raru Anutuji moren inore bine fukein ore mikipeya, oo ropeya. Roperu kotu fukeru ninigo eeboboyanun so maneyayon, mamanesinineji mango eteya ore eru jibu kaman ako baku ureru oo peku gobun. Naso madeyokaine Aisak Jeikob yokoji onuakon Anutuji moren yareinde jojofu bunu oi akon raugaru moren oo jikigaru kaman akoyanun baku ureru peku gobun.*

¹⁰ Sombun siti otunineji so goregain, Abrahamji oi noneingo odigaru goya. Anutuji siti ore buru ruaru sasakoine baku pi otunyanun sikeku bako sanan qanqanine pe ropein, oo ropeingo eru odigaru kaman akoo goya.

¹¹ Onu goku ni pogo fukeyayon, mamanesinineji mango eteko sanangaru mama fukeya. Abrahamde nonun Sara inoji kufin goyayon, oi jibu kuagaru made roya. Anutuji Abrahamde kufufun soguine fukeinde bunu kiperu oteya, inore eru bunuineji foriineke fukeingo manesin garu goya. Mamanesinine oiji mango eteko madeine fukeko noneya.* ¹² Ni moakon inore mamanesinji mango eteko komekiine kamasi fukeyayon, oi jibu inoreone kufufun soguine yobu fukebun. Bobun qonikingo tamaebi jareyanun oseingo embimbimgagobenen, me magen koe qanango pega, osigidapuineji ore so saueru fukebun.*

Ninigo yoo Sombun kaere ani sogo maneru

* **11:8:** Jen 12.1-5 * **11:9:** Jen 35.27 * **11:11:** Jen 18.11-14; 21.2 * **11:12:** Jen 15.5; 22.17; 32.12

gobun:

¹³ Nijigo sunduyanun oi migobenen, yonjo sosowo manyanun kerisieru Anutu manesin gaku goku komebun. Anutuji moren yareinde bunjo kipe yabeko gobunyon, moren oo so ropebun. Onu matayon, morenyanun oi jorigo dimaku piku noneru ohoweine baku jeriebun. Noneru mo jerieru ini mitaningaru mibun, “Morengo kotu fukeru qanda gogobenen.”* ¹⁴ Nijigo yonoyanunde pi morenyanungo ropeniminde janjanbumbun odeegobi, yonjoji bunjo onu miegobi. ¹⁵ Moren bokebun, ore manesuku bunjoine minobun ine, yonjoji soine kirieru oo rabi manyanunji tarina.

¹⁶ Soine kirienobunyon, yonjoji ore eru so manesuku gobun. Ore eru matayon, kantri funjine mo Sombungo pega, oo ropenimingo anji sogo maneru gobun. Anutuji yonjore siti bame ore eru Anutu tinaine “Nonunde Anutu!” mikabi oi maneru jerieru yonjore eru mimi mo so maneega.

Abraham, Aisak, Jeikob, Josef yonjore mamane-sin

¹⁷ Anutuji Abraham eesoigo ruako mamane-sinjineji mango eteru Aisak Anuture yaun oteya. Anutuji Aisakre moren oteingo ojime Abrahamji jojofo bunjo oi raugayayon, jibu madeine moakon oi mane tariru oiji boji rigaingo eya.*

¹⁸ Anutuji Abrahamde bunjo ini ojiya, “Aisakji osigidapugo mango eyareko fukeru gore tina osigaru gonimin.” Bunjo oi maneyayon, jibu

* **11:13:** Jen 23.4; 1 Hist 29.15; Kiki 39.12 * **11:17:** Jen 22.1-14

madeine koroo ruaya.* 19 Ruaru inji osoeru manesuya, “Komeinyon, Anutuji soine sanangaru bogboreme komegone pakerein.” Soso buño onu miya, ore so madeineji moke jikigaru komegone onuine pakereme ogagaya.

20 Mamanesijineji Aisak mango eteko madeyokaine Jeikob eru Esau (Iso) oi mifia yareya. Anuturo mifia oiji daman jikiineo onuakon saga yapeko paiyakungo ropeeingo ore onga wosiya.*

21 Jeikobji komeingo eya, daman oo mamane-sijineji mango eteko madeine Josefre madeyoka yoyoka oi mifia yaperu gbaruinere tifeineo roe-garu Anutu ohoweine baku miteñ gaya.*

22 Josefre komeineji bombengaya, daman oo mamanesijineji mango eteko Israel kufufun Ijipt bokeru warebun, ore sunduine oi keg-boreru yajiya. Onu yajiru jiki qongbunine uro yonganiminde buño oi mitiga yareya. Onu.*

Mosesre mamanesij

23 Mamanesinyakunji Mosesre mangomama mango eyateko Mosesji fukeya, oi daman oone fungaru kain yokaomere so sumungabu. Made oi none anjiineke kamasiine mo fukeya, oi noneru kin koitore mimiti egu odurenimire kokoi so eru madeyakun sumungaru sinan gabu.*

24 Mosesji sogueme tinaine farao kin oduinere made ongabí mamanesijineji mango eteko tina oi osigaingo takigaru farao koitore pi bokeru

* 11:18: Jen 21.12 * 11:20: Jen 27.27-29, 39-40 * 11:21: Jen 47.31-48.20 * 11:22: Jen 50.24-25; Eks 13.19 * 11:23: Eks 2.2; 1.22

rauseya.* ²⁵ Soine jikigaru Ijipt yonoke agiburande jeri bofukeru oi daman pomponine kosa jerienayon, gogoine onuine oi nadi gaya. Oi nadi gaku Anuture mankekerisie kufufun yonoke jikigako sisikonkon eyarebi oi moko maneru jogbasasanan enimin ore maneko ropekiine fukeya. ²⁶ Anutuji furi otein oobe piku dimaku sanangaya. Ore eru Ijipt yonoji june masapuyanunke fukeru batigatiine tomiri gobun, ore maneko ya wawakiine fukeya. Oiji ya wawakiine fukeko nadi gaku Munanqoqo Rauineke jikigako inore eru igosisi eteru gobunyon, oi maneko jibu foriineke eru ropekiine fukeya.

²⁷ Mamanesinijineji Moses mango eteko Ijipt farao koitoyanunde man egu rigangain ore kokoi so maneru kantriine bokeru wareya. Anutu nononeine mata oi nononeinere kamasi manesuku goya, ore eru yamen keku dimaku sanangaya. ²⁸ Mamanesinijineji mango eteko nonemain komban* ruaru ore buru mitiga yareko jerieru nebut. Qoqokomere mimererenji Ijipt manineo moru madepuyanun yabeko Israel yonore madepuji egu komeniminigo ore mitiga yareko mendiyanungo dari rau tebut.*

²⁹ Mamanesinyanunji Israel ninigo mango eyareko Koe Boboron oi moren pajiineo rarainere so petigaru warebut. Ijipt mamari ni yonoji oi petiganiminigo esoebunyon, obuji

* **11:24:** Eks 2.10-12

* **11:28:** Anuture mimererenji

Israel ninigo none yaberu embon eru yadureya ore komban oi nonunde bunoo 'Nonemain komban' mibenen Webu bunoo

'Pasowa' migobi.

* **11:28:** Eks 12.21-30

kefa yabeme noru sibirigabuŋ.*

Reihab eru mamanesinde nŋigo yo goine

³⁰ Mamanesiŋyaŋunji Israel kufufuŋ maŋgo eyareko Jeriko taŋgo wareru saine una 7:de so roregaru moko ra warebi saine sananŋine oiji kirigaru wakibuŋ.* ³¹ Mamanesiŋineji sau nŋigo Reihab maŋgo eteko iŋi eko Anutuji ŋoneru emboŋ eya: Israel minebobo yokoji moreŋ ŋoneru manenimi ore kamiine warebire ogo eku kepore yapeya. Anutuji oi ŋoneru jiki qoqomuku nŋigo yabeko sibirigabi Reihab ŋoneru emboŋ eteme yonjoke moko so komeya. Onu.*

³² Wamo buŋo moke jikigaru minobo? Deiwid, Samuel eru kajeqouŋ nŋigo goine yonjore binan jikigaru minobo ine, nonde damanji so sagana.*

³³ Mamanesiŋyaŋunji goine maŋgo eyareko morumboŋ saine saine bouruŋgaru siŋan garu nŋigo botiŋ yabebi eebobo poretiŋ boyoberu gobuŋ. Anutuji ya noreinde buŋo kipeme pega, kokoineji buŋo ore so oŋga wosiru manesiŋ gabi foriine fukeme robuŋ. Goineji laion joma botuyanŋo oŋga wosiru manesiŋ gabi Anutuji laion mauyaŋuŋ kipeya.*

³⁴ Goineji misi boruŋ maŋgo oŋga wosiru manesiŋ gabi Anutuji misi usuŋine qokobeko so ja yabeya. Goine jigore siqo sogoji yabeinŋo ebi Anutuji yonjore siqo mi maari eme peroriebuŋ. Kokoineji bedanŋine fukeru oŋga wosiru manesiŋ

* **11:29:** Eks 14.21-31 * **11:30:** Jos 6.12-21 * **11:31:** Jos 2.1-21; 6.22-25 * **11:32:** Koito 6.11-8.32; 4.6-5.31; 13.2-16.31; 11.1-12.7; 1 Sml 16.1-1 Kin 2.11; 1 Sml 1.1-25.1 * **11:33:** Dan 6.1-27

gabi Anutuji usun yareme sanangabun. Goineji jigo qaku onga wosiru manesin gabi Anutuji usun yareme mamari sanan qanqanine fukebun. Kotu yonore mamari kubuji warebi goineji onga wosiru manesin garu oone yobe yabebi totieru rabun.*

³⁵ Nigo goine tifeyanunji komeko onga wosiru manesin gabi Anutuji bogboreme komegone pakereko moke jikigaru qodurebun. Ninigo goine kome nadiineo senginbanjin ropekiine bofukeningo maneru yamen keku dimabun. Onu dimabi kumunenji yaberu sisikonkon funne funne eyareku ini yajibun, "Anutu mugande pipa pirue gukimin." Onu yajibunyon, yonoji oi usebi jikigaru qaima eyareru gobun.* ³⁶ Goineji Anutu manesin gabi igosisi eku nonoru jorunekeji yabebi joisereren funne funne bofukeru gobun. Jikigaru goine nigin yaberu witi piine piine oo rua yabebi gobun.*

³⁷ Goine koji yabebi komebun. Goine segeji boti yabebi yoyoka fukebun. Goine jigore siqo sogoji yabebi komebun. Goineji lama sakiine eru nonin sakiine oiji kaman onquine keru kosa raru roregabun. Onu wakiqoqoine yobu fukebi kekesuesue eru sisikonkon kosa eyarebi gobun.*

³⁸ Sombunde kuririyannke fukeru morende eebobo sembene ore manebi so saga yabeme oo so jikigabun. So jikigaru kosa roregaru moren buroineo ra wareru tukuine tukuine roperu

* **11:34:** Dan 3.1-30 * **11:35:** 1 Kin 17.17-24; 2 Kin 4.25-37

* **11:36:** 1 Kin 22.26-27; 2 Hist 18.25-26; Jer 20.2; 37.15; 38.6

* **11:37:** 2 Hist 24.21

wakiru koun me moren popouinere mango peku gobun. Onu.

³⁹ Ninigo sunduyanun migo, oi sosowo mamanesinyanunji mango eyareko manyanun kerisiebi Anutuji none yabeme sagako mibooro yareme gobun. Onu gobunyon, oi jibu Anutuji senjinbanjin funine mo noreinde bunjo kipeme pega, oo yonoreone moji mo so ropeya. Mata.

⁴⁰ Anutuji oi yonoyanekon matayon, nonunke moko kuririnojunke fuke forekimin ore manega. Onu maneru ore eru senjinbanjin funine mo noreko bofukekiminde bunjo buru ruame pega. Onu.

12

Anutuji mama enoreru botin nobeega.

¹ Ninigo kubu soguine yobu onjuineji mamanesinde fune kitingaku miku kuan onjuine rore noberu dimagobi, oi manegobenen. Ore eru nonun onuakon yobinnonun sosowo eru agiburan afaine akon karin nobeega, oi bokebenen raine. Anutuji nonun mamanesinde jigo qaku Satan gbin etekiminde buru ruame pega. Ore eru gogo botuine yo goku komekimin, botuine oi nadurende gadurebe onjuine yamen keku jigo qaku giningaru rainebenen. ² Yesuji mamanesinnonun qowirieme fukeko bosogueru sanangaru kuririineke fukeega, Rauine oi jinononunji piku poretin noneinebenen. Inoji soine jikigaru Sombun kao goku jerienayon, oi bokeru wakiru ore mobeine joisereren maneya. Maripongo suronqoqo onjuine komeinde mimi

maneru oi so useyayon, oi tumoqoqoo maneku karieru komeya. Komeru Anuturu morumbon nejeo roperu me furoineo neja.

³ Agiburan ninigo yonjoji onu kiso etebi joisereren maneya, nonjoji oi manesuku goinebi. Gbaniru wirieru manwawaki fukeru dimaku manesin-nanun eru oorinanun egu bokenimin ore onu eeinebi. ⁴ Agiburan egu ekimin ore jogbasasanun eru jigo qaku gokabi oo agiburande Rauji darijombun (jobu) so nabeya. ⁵ Mamaji odumadepuine yonore unsowon bunjo yarega, Anutuji ore so bunjo mo ini najime oi niga nabeko gogobi,

“O madene, Ofonji botin guega, ore eru manende wawakiine so eine. Bunjo migareko oo manwawaki so fukeru goigon.*

⁶ Ofonji ninigo manji jojoko eyareru oi botin yabeega.

Ninigo odumade onuine oga yaberu sinan yabeega, yono sosowo kobinji yabeega.”

⁷ Odumade mo mamaineji so botingako kosa gona, onuine inore odumade so fukena. Ore eru Anutuji nonjo odumade onuine enareega. Ore eru yobin nareme oi botin nabeinde kamas manesuku maneku karieru poretingaru goinebi. ⁸ Anutuji odumadepuine sosowo botin yabeega ore so nonjo so botin nabena ine, inore odumadepu foriine so fukenobun. Onu nonjo-nanunde anigo begu yan odumade mananun tomiri onuine fukenobun.

* 12:5: Job 5.17; Qoq 3.11-12

⁹ Buño oi moke inji mibemini: Morende mama-puji botini nobebi oi arani ba yareru goben. Sakire mamapuji wawakiine fukegobiyon, mande Manonunji foriine eru ropekiine fukega. Ore eru injore buño rurumango raru poretingaru goku sanangabenen sagani. ¹⁰ Sakire mamapunojunji yonoyanunde mamane so yamen keku morengo daman pomponine gokimini ore eru botini noberu goegobi. Yonoji onu goegobiyon, Anutuji roosoe nobeko injore so gbagbataenine fukekimini ore eru botini nobeega. Onu eru fofori fiine eru senjinbanjini fukekimini ore manega.

¹¹ Moji botini nobeko daman oo akon jeri kamasi so eegobeneyon, beusembe joisererenineke maneegobenen. Buño oi foriineyon, ore fori oi jiki inji fukeini: Anutuji ninigo onuine oiji bogbore yabeega, yonore eeboboyanunji poretingame womo qa yareko maneru gonimini. Onu.

Un̄sowan̄ eru sin̄an̄ bobo buño goine

¹² Ore eru “Gbeonanjun tariko menanjun yobingaru gbaniru dimaga, oi bofengaku botingainebi. Qunanjun pougaru dikan-nanjun mukuga, oi basanan gainebi.” Biñe buño mo onu pega.* ¹³ Odeqindoninekeji odefosiru wakiru game kufuineji mukuru egu sembea foreini. Buño ore so ogonanjun qoqomuku so eteinebiyon, fiaingo ore yamen keku goinebi. Biñe buño mo inji pega,

* **12:12:** Ais 35.3

“Kufu oderu rarainere kadiŋaŋuŋ botiŋ gabi poretiŋ fukeinebi.”

Buŋo ore so beufi naduŋgadun eku goinebi.*

¹⁴ Niŋigo sosowo yonoke womoo maŋmoakon gonimiŋ ore sananŋaru yameŋ keku goinebi. Moji gogo gbagbataeŋine so bofukeiŋ, iŋo mo Ofon so ɲoneiŋ. Ore eru Anutuji bagbagbaga ɲabeŋ ore yameŋ keku dimainebi. ¹⁵ Moji Anuturre yaunmoriri egu odureru so rauganimiŋ ore sisiŋaŋ ee eku goinebi. Uqo gioo wou mokiineke oi goduineke unugaegobeneŋ. Ore so maŋmokire fuŋne sosowo oi igogainebi. So igogabi oiji sogueru waperu bojiqojibu enareko kokoine ɲonore manji egu kebojigaiŋ.*

¹⁶ Onuakon moji boesau egu eiŋ me Esau (Iso) onuine wuwunuŋineke egu eku goiŋ ore sisiŋaŋ ee eku goinebi. Esauji moru made fukeya ore merofu rauine fukeyayon, buŋo oi uqo ateine moakon noiŋ ore eru igogaya. Igogako gboine Jeikobji merofure buŋo oi uqo oiji furiine baru raugaya.* ¹⁷ Jiki jojofo buŋoyakunde so fukeko Mamainere mifiaji Jeikobre paio ropeya, ɲonɔ oi manegobi. Onu ropeko Esauji mifia oi raugaiŋgo maneru kariyeru kuyome jiŋo kuineji wakiya. Onu yameŋ keku karieyayon, jibu buŋo gboineke kipebu, oi kepieinde fuŋne mo so bofukeya. Ore eru moru madeinere mifia oi raugaiŋgo maneyayon, oo quŋgaru embimbiŋgaya.*

¹⁸ Ronekon Israel kufufun yonoji Sainai (Sinai) maŋfunŋo wareru dimabi tuku oo misi

* **12:13:** Qoq 4.26 * **12:15:** Dut 29.18 * **12:16:** Jen 25.29-34

* **12:17:** Jen 27.30-40

borunji jaya. Jaku ju pupueku wakiru qisiri bako gbuṅparandan game Anutuji oo yonoke jojofo buru baya. Sainai (Sinai) tuku oiji meji yonokiminde so fukegayon, nonoji tuku onjuine ore manfunḡo so wareru waperu gogobi.*

¹⁹ Anutuji jojofo buruine oi Sainai tukuo ini eya: Mimererenpuineji qeṅ funine mo putebi keumanḡaru kirie wareko buṅo sananine miko ore fonunine manebuṅ. Oi maneru buṅo onjuine moke so yajiin ore eru kariebuṅ. Nonoji tuku onjuine ore manfunḡo so wareru wape gogobi.

²⁰ Anutuji buṅo sananine miku ini mitiga yareya, “Moji ninigo me kanen joma moji tuku oi yonoin ine, oi koji qabi komein.” Onu mitiga yareko buṅo oi boyobenimingo maneru yobinḡaru embimbḡabuṅ. Ore eru buṅo moke so yajiin ore kariebuṅ.* ²¹ Ya momokiine yobu oi piku nonebi Mosesji ini miya, “Non kokoi maneru gburugburu nume dimago.”*

²² Nono onu matayon, nono man-nanun kerisieru Zaion tuku bombenḡaru waperu gogobi. Anutu gogo Rauinere siti tinaine Jerusalem Sombunḡo pega, oo mimererenpuine ten taosenine ten taosenine yonoji kubuine kubuine baku kiki keru woku jeribari eegobi, nonoji siti oi bombenḡaru gogobi.

²³ Rone fufuke gariine fukeru mankekerisie ku-fuṅ fukebi tinayanun Gogore tina buru buk pa-piḡo quranḡabi Sombunḡo pega, nonoji yonore kubu yasogo oi jikigarḡu gogobi. Anutuji ninigo

* **12:18:** Eks 19.16-22; 20.18-21; Dut 4.11-12; 5.22-27 * **12:20:**

Eks 19.12-13 * **12:21:** Dut 9.19

sosowo nonunde buɲo osoeru mitariega, ɲonɔji nemunonun inoke jikigaru gogobi. Anutuɟi ɲinigo bofosike yabeko qowirieru kuririyannunke fukeru komebun, ɲonɔji yonore iiruke jikigaru gogobi. ²⁴ ɲonɔji jojofu buru gariinere sinan Yesu inoreo wareru inoke qakatoru dimagobi. Inɔji dariine tieko rau ɲareega, gogo onuineo waperu gogobi. Abelji dariine keseyayon, Yesure dariji Abelre dari odureru buɲo kuririinekere moge fukega.*

²⁵ Rone ɲi moɟi morengo goku Anuture man anɟi ɲinigo bararinga yareme kokoineɟi oi maneingo usebi Anutuɟi geoine bokirieme paiyanungo ropeya. Yonɔji oone perorieingo embimbungabun ine, nonun urunu perorienobenɟ? Daman yoo ogononun moɟi Anuture man anɟi Sombungone bararinga noreru miega, nonun oi keoma eru bokegobenen ine, yobingone so yobu peroriekimin. Qoqomukunonunde geo fofori painonungo ropein ore manegobenen. Ore eru moɟi sanu game manegobi, ɲonɔji buɲo oi maneru rengakimin ore kajegi me gbegbedi so einebi. Kajeboɟi egu gonimin ore sisinan ee eku goinebi.*

²⁶ Ronekon bunɔine yajiko moren igogaru yoyowogayayon, kajeqoun bunɔine mo mikipeme daman yoo inɟi pega, “Daman mogo moren moke igogaru yoyowogabemin. Moren akon matayon, ya ebe qonikinɟi onuakon igogain.”* ²⁷ Buɲo onu pegayon, “Daman mogo moke” miga, buɲo ore funine oi inɟi: Anutuɟi yareya bofukeme pega, oiji

* 12:24: Jen 4.10 * 12:25: Eks 20.22 * 12:26: Hag 2.6

akon igogaru kepieinyon, Sombunde yareya so kepiein, oiji dimaku sanangaru pe ropein.

²⁸ Nonun qoruman so kepiein, oi raugaru dimagobenen. Ore eru “Anutu dange!” miku onu oiji ohoweine baku miten gaku beufi oteeinebenen. Oi miine egu odureniminde kokoi maneru aran baku goinebenen. ²⁹ Nonunde Anutuji misi borun onuine fukega. Ore eru joineji egu ja nobeko joisereren manekimin ore kokoi paio aran ba teeinebenen. Onu.*

13

Uḡsowon buḡo tatarine

¹ Mankekerisie ogopunonun nono-ḡaḡe manji jojoko nadungadun eku goinebi. ² Kotu ninigo botunangungo warenimin, yono sinan yaberu mango eyarebi anibanj bofukeenimin. Onu einḡo ore so niga ḡabeeine. Goineji onu ebuḡ, oiji Sombun mimereren goine so mane taningaru moko kepore yabebi piyanungo gobun.* ³ Goineji witi pigo gogobi, oi manesu yareeinebi. Nono-ḡaḡe yonoke nigin ḡabebi gonobun, kamasi oi maneru oi manesu yareeinebi. Goine bosembea yabebi ore joisererenine manegobi, oi nono-ḡaḡe onu gonobun, onuine maneru manesu yareeinebi.

⁴ Ninigo jikiboti eru boesau egobi Anutuji yono mitari yarein. Ore eru sosowo nonoji ḡoe nonun gogo oi aran babi gbagbataenine fukeko ḡoe nonun botuyakunḡo kekeroin buḡo wununine mo so eine.

* **12:29:** Dut 4.24 * **13:2:** Jen 18.1-8; 19.1-3

⁵ Anutuji inoyone buño mo ini mime pega, “Nonji daman mogo so boke guru ñadi gubemin.” Buño ore eru eebobonanjunji roku roin ore ebu so sase eeinebiyon, ya pe ñarega, ore eru manebi saga ñareme jerike goinebi.* ⁶ Onu maneru soine kobinoñunke jogbake dimaku ini miku gokimin, “Ofonji babapine fukeko moren ñinigoji sibiriga noniminde so onu so fukegobi. Ore eru kokoi mo so maneru gogo.”*

⁷ Sinanpunanjunji Anuture buño ñajibun, oi manesu yaberu goinebi. Eeboboyanun urunu eru babi gogoyanunji tariya, oi manesuku mamane-sinjanunde mosi boyoberu goinebi. ⁸ Yesu Kristo igokoine tomiri. Rone goya, oi akon munambe goga eru daman tatariine tomiri go ropein. ⁹ Yaunmoriri jikigaru raugabenen mannoñun basanangako faeinyon, uqo nokiminde mosi oi me oiji mannoñun basanangaingo embimbinaega. Goineji uqore sowo fune fune boyobebi eebobo oiji so yobu bapi yabeko mujugaya. Ore eru goineji sowo furuine furuine ñinigo qaji yareegobi, ñono buño oi bokeinebi. (Mosire buñoji tintun so enareine.)

¹⁰ Boji ririga koro alata funine mo oi nonunde pega. Morengo kaman seri sorin kubainere gio baegobi, yonoji boji funine mo ore mobeine roru noingo embimbinaegobi. Anutuji yonore buño onu so mitarime pega. ¹¹ Morengo sorin gio sinan qoruineji dimaku ñinigo agiburanyanun keririkein ore eru joma qaku dariine roru sorin kubainere manine mokiine yobu oo ropeegayon,

* **13:5:** Dut 31.6, 8; Jos 1.5 * **13:6:** Kiki 118.6

joma foriyanun oi roru moren kotu gogobi, ore sa sakiineo raru oo rigabi jaku josenaga.* ¹² Ore so Yesu onuakon kufufunpuine inoyonunde dariji bagbagbaga yabein ore eru siti sare mendi sakiineo qabi joisereren maneru komeya.

¹³ Ore eru kae yayaba* gogobenin, nonun ore sa sakiineo raru Yesureo jikigainebenen. Inore eru igosisi enoreegobi, oi osigaru goinebenen.

¹⁴ Oi yooore eru: Siti tatariine tomiri pe ropein, oi morengo so pe nobegayon, siti jiki fuke nor-ein, oi noneingo janjanbumbun oderu gogobenin.

¹⁵ Ore eru jijiki Yesuji mango enoreko Anuture mimiten pesin eru goinebenen. Yesure tina miten gaegobi, yonore mi bibire foriji Anuture pesin fukega. ¹⁶ Ya pe narega, oi boroingaru bobian nadungadun eegobi, oiji Anuture pesin mo fukega. Anutuji pesin oi noneko manineji flame sagaega. Ore eru onu enimin ore so niga nabeine.

¹⁷ Sinanpunanunde bunjo rengaru usunyanunde rurumango raru goinebi. Gio babun ore rop-uyanun Anuture jinoo ruanimin, yono ore so none naberu man-nanun sinan gaegobi. Yonoji gioyanun oi manyobin paio egu banimin. Oiji nono so babi nabena. Ore eru bunoyanunde rurumango raru gobi jeri paio gioyanun babi sagain.

¹⁸ Nono ninore eru Anutu onga wosieinebi. Ya sosowo oo eebobo tinabineineke ekiminde anji pe noreko Anutuji none noberu "Sagaga,"

* **13:11:** Lew 16.27 * **13:13:** Morengo daman pomponine gogobenin, ore tinaine yayaba.

miko maŋkajenoŋunji manebeneŋ fiaega. Buŋo oi mane mukugobeneŋ. ¹⁹ Nonde oŋga wosieinebi ore yameŋ keku yoore eru bapakare ŋabego: Njoŋo oŋga wosibi Anutuji daman so bojoroko fiaru soine moke ŋoŋoreo warebemiŋ.

Inji oŋga wosiego.

²⁰ Yesuji komeya ore eru lama siŋan tinabiŋeineke fukeru goga. Dariine keseru ore mogeineji Anuture jojofo buru qakatoru basanaŋgame daman tatariine tomiri pe ropeiŋ. Anutuji Ofoŋnoŋun iŋo bogboreme komegone pakereru sanaŋgaru goga.

²¹ Anutu womo Rauineji dobe ŋaberu maŋ aŋiinere so eba eku goniminde kuriri sosowo ŋareeiŋ. Oŋu soine sanaŋgaru gio fiine fuŋne fuŋne baku goinebi. Injoji roosoe ŋaberu bapakare ŋabeko Yesu Kristoreo kitingaku gogo Anutureo sagaga, oŋuine goinebi. Kristore tinabiŋe daman so miteŋ gabeneŋ daman tatariine tomiri kuririineke pe ropeiŋ. Buŋo oi foriine.

Buŋo tatariine

²² O maŋkekerisie ogopune, nonji inji weu ŋarego: Biŋe Quraŋ pompoŋine yo quraŋga ŋarego. Ore eru uŋsowoŋ buŋone yo yameŋ keku raugainebi. ²³ Biŋe yo maneniŋ: Maŋkekerisie ogonoŋun Timoti iŋo witi pigone piruebi wakiya. Pipa yoo wapeiŋ ine, non iŋoke wareru ŋone ŋabenimi.

²⁴ Momojo buŋo ruabe siŋanpuŋaŋun sosowo eru Anuture ŋiŋigo gbagbataeŋine sosowo yoŋo

yajiinebi. Itali ogopunoŋunji momojoyaŋuŋ ruabi
ŋoŋoreo foga.

²⁵ Anuture yaunmoririji sosowo ŋoŋoke pe
roperu peine.

YEESUS OPOR ELIWA
The New Testament in the Mauwake Language of
Papua New Guinea
Nupela Testamen long tokples Mauwake long Niugini
Copyright © 1998 The Bible Society of Papua New Guinea

Language: Mauwake

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

PDF generated using Haiola and XeLaTeX on 11 Nov 2022 from source files dated 9 Oct 2020

8f58ca10-b9a9-526e-979e-c3f5d5f85555